


弘簡錄

唐




四五

九三	三八	五一	漢書門類
册	架	函	號

三六	九一	五一	漢書類
函	三	六	號
一	册	架	類

内閣文庫			
番號	漢	5106	
冊數	93	(3)	
函號	286	83	



綴じ部(喉部分)の文字等が開きが不鮮明な場所あり

弘簡錄卷之四

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之六

文化乙丑初秋三日從福宮在大阪城中句云
三川重石水田剛文

玄宗皇帝諱隆基睿宗第三子母竇皇后以垂拱元年八月戊寅生於東都性英斷多藝洞知音律善八分書儀範偉麗有非常之表三年封楚王天授三年十月戊戌出閣開府置官屬朔望入朝時天后臨御金吾將軍武懿宗倚勢訶排儀從因欲折之時方七歲叱曰吾家朝堂干汝何事敢迫吾車騎天后聞之轉加寵愛長壽二年降封臨淄郡王聖曆元年賜第東都積善坊長安中從幸西京更賜第興慶坊屬王室多故陽引材力之士以自助歷右衛郎將尚輦奉御神龍初遷衛尉少卿宅外有

水池頃常泛溢望氣者以爲龍中宗特幸其第因遊于池結綵
爲樓船令巨象踏之景龍二年兼潞州別駕加銀青光祿大夫
州境有黃龍白日昇天又嘗出畋從者望見有紫雲在其上前
後符瑞凡一十九事四年郊祀來朝使術士韓禮指筮忽一莖
孑然獨立禮驚以爲奇瑞非常不可以言果中宗暴崩韋后稱
制改元唐隆與所居里隆慶相符益自負荷密以誅亂謀告于
太平公主公主喜即令子薛崇簡從復陰與朝臣尉幽求長
上果毅麻嗣宗萬騎果毅葛福順李仙臯道士馮道力處士劉
承祖寶昌寺僧普潤等定策或請先啓父王止之曰我拯社稷
之危赴君父之急事成福歸宗社不成身死忠孝安可先請憂
怖父王乎萬一不從吾計失矣密於庚子夜率幽求等數十人
自苑南入苑總監鍾紹京率丁匠以從分往玄武門殺羽林將
軍韋播高嵩持其首至衆歡呼大集攻白獸立德等門斬關而
進與左右萬騎合於凌煙閣前大譟宿衛梓宮萬騎聞之皆披
甲來應韋后惶惑而走爲亂兵所害於是分誅韋氏黨與韋溫
紀處訥宗楚客宗晉卿武延秀馬秦客葉靜能趙履溫楊均等
梟首安福門外黎明內外皆定比謁父王先謝不啓請之罪王
遽前抱泣曰宗社禍難由汝安定神祇萬姓皆賴汝力辛丑挾
少帝御安福門樓撫慰百姓卽拜殿中監龍武右軍將軍兼押
左右萬騎知內外閑廐同中書門下三品進封平王睿宗卽位
議建儲嗣大臣僉議除天下之禍者當享天下之福拯天下之
危者當受天下之安平王有聖德成器已下咸加推讓宜膺主
鬯以副羣心乃命有司擇日備禮丙午睿宗御承天門令詣朝
堂冊爲皇太子先天元年六月術人據玄象帝座及前星有災

皇太子合作天子不合更居東宮睿宗曰傳德避災吾意決矣
七月壬午制有司擇日禪代聞而惶懼馳見叩頭請所以傳位
之意睿宗曰吾藉汝功業宗社復安今帝座有寄思欲遜避唯
聖德大勲始轉禍爲福吾知易位於汝已爲晚矣明年太平公
主謀以七月四日因羽林軍作亂上密知之卽以中旨告岐薛
二王并郭元振王毛仲姜皎王琚崔日用先期定策取開廐馬
及家人三百餘率太僕少卿李令問王守一內侍高力士果毅
李守德與親信十數人出武德殿入虔化門臬常元楷李慈於
北關擒賈膺福李湫於內客省執蕭至忠岑羲於朝堂皆斬之
明日下午詔睿宗徙居百福殿賜公主死自今軍國刑政並取皇
帝處分上御承天門樓大赦天下大辟已下罪無大小咸赦除
之加邠王實封三百戶宋中一千戶岐薛七百戶并文武官勲
凡被諸按察及御史所摘咸與洗滌依次敘用丁卯除崔湜盧
藏用名長流嶺表追賜湜死壬申賞定策功加郭元振御史大
夫封王琚趙國公姜皎楚國公王守一晉國公李令問殿中監
王毛仲霍國公各實封五百戶高力士右監門大將軍山北信
任甲戌毀天樞己丑黜武氏七廟帝號依舊追贈王爵陵並稱
墓八月壬辰名還劉幽求復官實封九月癸丑封華嶽爲金
天王丁卯張說爲中書令己卯宴王公百寮於承天門賜物有
差冬十一月癸卯講武驪山元振坐虧失軍容配流新州給事
中攝太常少卿唐紹軍禮有失斬於纛下甲辰獵渭川名同州
刺史姚元之爲兵部尚書同三品十一月乙丑幽求兼侍中戊
子上尊號開元神武皇帝十二月庚寅朔大赦改是年爲開元
元年更僕射爲左右丞相中書爲紫微省門下爲黃門省侍中

為監雍州為京兆府洛州為河南府長史為尹自國初宰相及
功臣子孫未承恩者並量才擢用己亥禁潑寒胡戲癸丑劉幽
求張說罷姚元之為紫微令復名崇盧懷慎同平章事

開元二年春正月置左右教坊自教音樂自去秋不雨至于是
月關中人饑遣使賑給禱名山大川求直言丙寅姚崇請汰僧
尼二萬餘人甲申以薛訥同三品總兵六萬討奚契丹二月突
厥默啜遣特勒同俄率眾寇北庭右驍衛將軍郭虔瓘擊敗斬
之己酉旱錄囚徒己未突厥火拔頡利發石矢畢來奔授左衛
大將軍封燕山郡王三月太史奏日食不應或告幽求紹京王
琚怨望貶為睦果澤三州刺史停實封四百祇存百戶黜故酷
吏周利貞等十三人終身勿齒貶韋安石韋嗣立趙彥昭李嶠
諸州別駕夏五月辛亥魏知古罷六月甲子上皇徙大明宮避

刊定
姓族系錄二百卷

署上素友愛近世莫及羣臣請循故事以成器領岐州成義領
幽州守禮領虢州範領濟州業領同州皆為刺史政務委上佐
秋七月乙未焚珠玉錦繡及器玩於殿前停採造雕刻廢織錦
坊庚子薛訥與契丹戰灤河敗績削爵除名丙午昭文館學士
柳冲左庶子劉子玄上刊定姓族系錄二百卷吐蕃寇臨洮及
蘭渭州掠羣牧復起薛訥攝左羽林將軍隴右防禦使率杜賓
客郭知運王峻安思順以禦之八月戊午西天竺國遣使獻方
物九月庚寅作典慶宮丁酉宴侍臣于含元殿戊申幸溫泉自
此
頻年幸之
皆不書冬十月戊午訥破吐蕃於武階豐安軍使王海賓先
鋒力戰死之以郭知運為隴右節度使領洮岷蘭鄯等十二州
十二月乙丑封皇子嗣真鄜王嗣初鄂王嗣玄鄜王是歲右威
衛中郎將周慶立為安南市舶使與波斯僧廣造奇巧將以進

內殿中侍御史柳澤上書諫止上嘉納之三年春正月丁亥立郢王嗣謙為皇太子降德音大酺三日癸卯盧懷慎檢校黃門監夏四月突厥十姓部落及高麗莫離支高大簡都督跌思太等各率其眾來附制以河南地處之命薛訥居涼州郭虔瓘居朔州以為備禦六月山東諸州大蝗姚崇奏差御史下諸道遣人驅撲焚瘞秋稼有穫人不甚饑秋七月庚辰朔日食冬無雪十月甲寅選耆儒博學入內侍讀以光祿卿馬懷素左散騎常侍褚無量充之十一月丁亥相州妖賊崔子崑作亂討平之四年春正月戊寅朔太上皇于西宮始命郢王嗣真陝王嗣昇遙領安北安西大都護二月丙辰關中旱遣使驪山祈雨有應以少牢致祭禁斷樵採夏六月庚寅月蝕既癸亥太上皇崩年五十五辛未京師華陝大風拔木癸酉突厥九姓拔曳固殺默啜來降子將郝靈佺傳首京師復立兄子默棘連為可汗安置降者振武軍北山東河南河北大蝗遣使捕瘞秋七月丙申置黎州己亥上太上皇謚太聖貞皇帝廟號睿宗庚午葬橋陵改蒲城為奉先縣隸京兆府以奉陵寢十一月丁亥祔神主太廟遷中宗主于西廟甲午源乾曜為黃門侍郎同平章事十二月乙卯定陵寢殿災閏月己亥崇及乾曜罷以宋璟為吏部尚書兼黃門監蘇頌同平章事五年春正月壬寅朔不受朝賀癸卯太廟屋壞移神主于太極殿素服避殿輟朝五日己酉享于太極殿辛亥幸東都戊辰昏霧四塞二月甲戌還京大赦封故許王男淋為嗣越王以繼貞後訪求武德貞觀以來勲臣子孫無位者所在奏聞有嘉遯幽棲養高不仕者各以名薦并給復遭澇被蝗百姓三月庚戌奚契丹首領饒樂郡王率眾內附

夏四月甲午廢拜洛受圖壇及碑文并廟秋七月甲子改明堂
爲乾元殿受賀依正殿禮九月壬寅復兩省官名皆如故令史
官隨宰相入侍羣臣對仗奏事冬十月丙子太廟修完戊寅祔
還神主十一月己亥契丹首領松漠郡王李失活來朝十二月
訪求逸書令史官月奏所行事六年春正月丙辰朔不受朝
賀辛酉禁毀天下惡錢行二銖已上好錢二月甲戌徵嵩山隱
士盧鴻夏六月乙酉以五王配享中宗廟庭蘇瓌劉幽求配饗
睿宗廟庭秋八月庚辰旱慮囚九月乙未遣工部尚書劉知柔
持節往河南道存問賜父老帛冬十一月丙申享太廟廻御承
天門賜七廟已上支孫失官序者各與五品京官內外三品已
上有廟者賜物三十匹以修祭服及俎豆乙巳改傳國璽稱寶
官爲符寶郎十二月改諸王刺史憲涇州撫隆州範岐州業號
州憲與撫以避
昭成廟諱改七年夏五月己丑朔日食秋七月丙辰夕亢錄
囚諸州縣委牧宰量事處置八月癸丑敕五服並從禮傳九月
甲子徙封宋王憲寧王冬十月戊寅皇太子詣國學行齒胄禮
陪位官及學生賜物有差十二月丙戌復弘文館名并崇文館
各置校書郎等官八年春正月甲子朔皇太子加元服乙丑
謁太廟己卯宋璟蘇頲罷源乾曜復爲黃門侍郎張嘉貞中書
侍郎並同平章事夏六月壬寅東都暴雨穀水漲新安澗池河
南壽安鞏等縣漂蕩廬舍民及許衛等州班軍溺死數多秋七
月突厥欲谷寇甘源等州敗涼州都督楊敬述掠契苾部落而
歸遣王駿爲兵部尚書兼幽州都督韋抗爲御史大夫朔方總
管以禦之冬十一月辛未突厥寇涼州九年春正月以宇文
融爲勸農使聽州縣逃亡戶口百日自首過期者徙邊州夏四

同日
下曠
涼風
稍來
自公
召之
不之
得之

僧一行造曆深合項造黃道

御註孝經

月甲戌策試應制舉人於含元殿秋七月己酉王峻發隴右諸軍及河東九姓破蘭池州叛寇康待賓斬之獲級三萬五千丙辰揚潤等州暴風發屋拔樹漂損公私船隻辛酉罷先天中重修三九射禮九月己巳朔日食康待賓餘黨復叛貶峻梓州刺史癸亥張說為兵部尚書同三品冬無雪十一月丙辰元行冲上羣書目錄二百卷藏之內府庚午冬至大赦賜酺三日召還諸王刺外州者十二月乙酉命僧一行更造新曆梁令瓚造黃道遊儀十年春正月丁巳幸東都夏四月置朔方軍以張說兼領節度使遣往巡邊五月大雨東都伊汝水漲漂溺河南許汝仙陳等州廬舍民死甚衆遣戶部尚書陸象先存撫賑給六月辛丑頒御註孝經于天下己巳增太廟為九室移中宗神主以就正廟秋七月丙戌安南賊帥梅叔鸞等攻圍州縣遣內侍

楊思勗討之九月張說平待賓餘黨擒康願子於木盤山徙河曲六州殘寇五萬餘口於許汝唐鄧仙豫等州空河南朔方地千餘里甲戌姜皎洩言王皇后愛弛上欲廢之杖流欽州路死禁自今諸王公主外戚駙馬不得出入掖庭妄說言語百官不得與卜祝之人交游來往乙卯夜京兆人權梁山偽稱故襄王男率徒黨數百斬景風長樂等門入宮城構逆至曉兵敗斬首傳送東都冬十月癸丑復以乾元殿為明堂十一月乙未初令宰相食實封三百戶十二月停按察使是歲張說建議罷府兵召募壯士以充宿衛更番上下兵農之分自此始十一年春正月己巳巡幸并州改名太原府建為北都官吏補授一準京兆給復百姓一年貧戶二年元從功臣五年子孫未官有才堪文武者搜揚以聞御製起義堂頌并書刻于石庚辰次潞州改

成
聖
書
院

舊宅爲飛龍宮。宴父老。赦大辟以下。給復五年。戊辰。次晉州。壬子。祠汾陰后土。昇壇行事。賜陪位官勳階。有差。改汾陰爲寶鼎縣。罷張嘉貞爲幽州刺史。除張說中書令。王駿兵部尚書。同三品。五月。駿改朔方節度。兼知河北。隴右。河。西。兵。馬。使。六月。赴軍。秋。八月。戊申。尊八代祖宣皇帝廟號。獻祖。禘于九廟。九月。己巳。頒所撰廣濟方。令諸州各置醫博士一員。其春秋釋奠。依舊用牲。屬縣乃用酒脯。冬。十月。丁酉。幸新作溫泉宮。十一月。戊寅。南郊大赦。賜天下酺三日。京城五日。十二月。甲午。幸鳳泉湯。庚申。貶王駿。斬州刺史。是歲。置麗正書院。以張說爲使。說奏。改政事堂。列中書門下五房於其後。分掌庶政。命左丞蕭嵩。遷京兆。蒲。同。岐。華。白。丁。一。十二萬充長從宿衛。十二年春。三。月。起復。杜暹爲安西副大都護。夏。四。月。降封神龍。以後。傍。繼。國。王。禮。當。廢。而。屬。近。者。皆。爲。郡。王。六。月。遷臺閣名臣。以爲諸州刺史。秋。七。月。壬申。月蝕。既。已。卯。廢皇后王氏。冬。十。月。后。死。十。一。月。庚申。幸東都。至華陰。御製岳廟碑文。羣臣表請封禪。庚辰。五溪首領覃行璋反。楊思勗討平之。擢爲鎮國大將軍。閏。十。二。月。丙辰。朔。日。食。十三年春。二。月。宇文融知上急於川度。歲終。增。緡。錢。數。百。萬。悉。進。入。宮。上。寵。之。擢。爲。御。史。中。丞。兼。戶。部。侍。郎。乙。亥。更。命。長。從。宿。衛。爲。曠。騎。分。隸。十。二。衛。二。月。甲。午。改。皇。太。子。嗣。謙。名。鴻。徙。封。嗣。直。慶。王。名。潭。嗣。昇。忠。王。名。浚。嗣。真。棣。王。名。洽。嗣。初。朗。王。名。涓。嗣。玄。榮。王。名。浣。又。封。少。子。浚。光。王。濼。儀。王。湮。頴。王。澤。永。王。清。壽。王。泐。延。王。沐。盛。王。溢。濟。王。夏。四。月。丁。巳。改。集。仙。爲。集。賢。殿。麗。正。爲。集。賢。書。院。置。學。士。直。學。士。癸。酉。令。朝。集。使。各。舉。所。部。孝。悌。文。武。之。士。集。於。泰。山。下。五。月。庚。寅。妖。賊。劉。定。高。夜。犯。通。洛。門。擒。

斬之六月乙亥廢東都西市冬十月癸丑新造銅儀成置於景
運門內辛酉東封駕起東都十一月丙戌至兗州太宗頓丁亥
致齋於行宮己丑日南至備法駕與宰臣禮官登山仗衛羅列
于下百餘里行從留谷口庚寅祀昊天上帝於上壇羣臣祀五
帝百神於下壇禮畢藏玉冊於封祀壇之石甃然後燔柴燎發
傳呼萬歲自山頂至下震動山谷上還齋宮慶雲見日抱戴氣
辛卯祀皇地祇於社首封藏皆如禮壬辰御帳殿受朝賀大赦
天下盡還流人內外官賜爵級登山官增階封泰山爲齊天王
禮秩加三公一等近山十里禁樵採輔臣乾曜左丞相兼侍中
說右丞相兼中書令甲午駕還丙申幸孔宅設奠十二月己巳
至東都分吏部爲十銓勅禮部蘇頌刑部韋抗工部盧從愿等
分掌選事時累歲豐稔米斗十錢青齊斗五錢十四年春正
月命張說修五禮折衷貞觀顯慶兩書行之二月庚戌朔邕州
獠梁大海周光等據賓橫等州叛陷四十餘城遣楊思勗討之
夏四月張說罷政停官丁亥李元紘同平章事辛丑置軍於定
恒莫易滄等五州以備突厥五月癸卯戶部進今歲計帳管戶
七百六萬九千五百六十五口四千一百四十一萬九千七百
一十二六月戊午大風發屋毀端門鳴吻命中外上封指言闕
失無有所隱秋七月癸丑夜澀水瀑漲漂沒諸州漕船溺者甚
衆九月己丑杜暹同平章事是歲天下水旱并霜河南北尤甚
蘇同常福漂壞廬舍遣宇文融檢覆賑給之十五年春正月
戊寅令草澤文武高才詣闕自舉辛丑涼州都督王君奭破吐
蕃於青海西獲輜車馬羊而還二月己巳張說致仕以朋黨免
御史大夫崔德甫官左遷宇文融魏州刺史夏五月置十王宅

并百孫院太子不居東宮常依乘輿所幸別院其皇子各開府置官屬遙領藩鎮都督節度大使然不出閣諸孫惟侍讀時入授書其餘歲時通名而已秋九月丙子吐蕃寇瓜州執刺史田元獻殺掠人吏取軍資倉糧而去丙戌突厥毘伽可汗使大臣梅錄啜來朝閏月庚子突騎施蘇祿吐蕃贊普圍安西副大都護趙歸貞擊走之庚申回紇部落殺王君奭于甘州以兵部尚書蕭嵩總兵兼判涼州以禦吐蕃是歲六十三州大水十七州霜旱河北大疫遣左監門將軍黎敬仁轉江淮粟數百萬往賑恤之十六年春正月庚子始聽政于興慶宮復用宇文融爲九河使請于九河故道開稻田官收其利以張說爲集賢院學士每朝廷有大事遣中使訪之二月改曠騎爲羽林飛騎壬寅趙歸貞敗吐蕃于曲子城秋七月又寇瓜州刺史張守珪擊破之乙巳蕭嵩并鄯州都督張志亮攻拔吐蕃大莫門城斬獲數千級收其資畜而還八月己巳張說進開元大衍曆命有司頒行之辛卯嵩遣杜賓客復破吐蕃于祁連城獲其大將一人斬首五千級擢加平章事是歲勅長征兵分五番五年酬勲五轉歲遣一番還家洗沐制戶籍三歲一定分爲九等十七年春正月限明經進士每歲及第定爲百人二月丁卯雋州都督張審素攻拔昆明及鹽城殺獲萬人庚子復張說左丞相甲寅信安王禕攻拔吐蕃石堡城夏四月禕于太廟令中書門下分就大理京兆萬年長安等獄疏決囚徒減天下死罪一等餘並原之丁亥大風震電藍田山崩五月癸巳復置十道按察使六月甲戌停乾曜兼侍中罷杜暹李元紘以蕭嵩兼中書令宇文融爲黃門侍郎裴光庭中書侍郎並同平章事秋八月五日上降

通鑑錄 卷之四 天王唐六

誕日讌羣臣于花萼樓因請立千秋節王公以下獻鏡及承露
囊天下諸州咸令讌樂休暇三日村閭社會並就是日編爲令
乙酉罷源乾曜以宋璟爲右丞相九月壬子宇文融有罪貶昭
州平樂尉道卒冬無雪十月戊午朔日食不盡如鉤癸未睦州
竹實十一月丙申謁橋陵遙望涕泣哀動左右曲赦奉先縣大
辟以下罪以管內萬三百戶供灑掃三府兵馬宿衛戊戌謁定
陵巳亥謁獻陵壬寅謁昭陵乙巳謁乾陵戊申還宮大赦放還
流人移左降官蠲百姓今年地稅之半每陵取側近六鄉供灑
掃加內外官爵級有差十八年春二月丙寅大雨雪俄而雷
震飛龍廡災三月命侍臣百條每旬暇日賞勝行樂丁卯宴侍
臣春明門外寧王園池上御花萼樓邀迴騎坐飲遞起爲舞頒
賜有差五月契丹突可汗殺其主李召固率部落降于突厥奚

王李魯蘇亦叛制幽州長史趙含章討之六月庚申命近臣五
品已上各舉才堪邊任及刺史者甲子彗出五車癸酉亭出畢
昴壬午灑洛泛漲壞天津水濟二橋及堤并損仗舍民廬千餘
命范安及韓朝宗就水源䟽決置門以節其勢秋八月丁亥上
御花萼樓百官獻賀賜四品已上金鏡珠縑綵五品以下束帛
又賦八韻及秋景詩冬十月吐蕃遣大臣名悉臘獻方物請降
許之十二月戊子豐州刺史袁振坐妖言下獄死是歲天下奏
死罪二十四人十九年春正月壬戌貶王毛仲襄州別駕中
路賜死黜黨與十數人辛卯以詩書賜吐蕃遣鴻臚卿崔琳攝
御史大夫往聘之丙子親耕于典慶宮龍池巳卯禁捕採鯉魚
天下州府春秋二社及釋奠停牲牢惟用酒醢夏四月丙申兩
京諸州各置太公廟以張良配享春秋二仲月上戊日致祭壬

戊令五嶽各置老君廟秋八月千秋節赦囚徒九月辛未吐蕃
遣其國相論尚他碑來朝冬十二月戊戌裴光庭上搖山往則
維城前軌各一卷勅賜皇太子諸王二十年春正月乙卯信
安王禕率兵討奚契丹三月與趙含章大破之於幽州五月戊
辰獻俘上御應天門受之加王開府儀同三司六月廣花萼樓
築夾城至芙蓉園秋八月辛未朔日食九月乙巳蕭嵩等上開
元新禮一百五十卷頒所司行用渤海靺鞨寇登州殺刺史韋
俊命左領軍將軍蓋福順發兵討之冬十月丙戌巡北都命所
至舉賢才未聞達者辛卯幸飛龍宮皆復其民十一月庚午祀
后土於睢州大赦盡假勳臣緋紫大酺三日十二月壬申還京
戶部計戶增舊七十九萬一千六百七十一口增舊四百零一
萬一千五百五十三二十一年春正月庚子朔制減貢舉人

尚書論語兩條加試老子策乙巳毀儀坤廟祔肅明皇后神主
于太廟己未工部尚書李嵩復吐蕃三月甲寅韓休為黃門侍
郎同平章事閏月幽州道副總管郭英傑等討契丹敗績死之
夏四月丁巳久旱命陸象先杜暹等七人往諸道宣慰賑給黜
陟官吏疏決囚徒丁酉加寧王太尉薛王司徒慶王太子太師
忠王開府儀同棣王太子少傅鄂王太子太保五月甲申納皇
太子妃薛氏降天下死罪流以下釋之賜在京文武勳一轉秋
七月乙丑朔日食九月壬午封皇子溢濟王沔信王泚義王濯
陳王澄豐王懋恒王漩涼王滔深王冬十一月戊子宋璟致仕
十二月丁未蕭嵩為右丞相韓休兵部尚書並罷政事裴耀卿
為黃門侍郎起復張九齡中書侍郎並同平章事是歲分天下
為十五道京畿都畿關內河南河東河北隴右山南東西劔南

淮南江南東西黔中嶺南各置採訪處置使擢楊慎矜爲監察御史知太府出納關中兩害稼出太倉米二百萬石給之十二年春正月癸亥朔制古聖帝明王嶽瀆海鎮祭用牲牢餘並酒醑充奠己巳幸東都辛未遣嚴挺之裴寬裴敦復往河南懷衛邢相等州巡問賑給量貸種子二月壬寅秦州地震不止殷殷有聲壞解宇廬舍壓死者衆命蕭嵩往祭山川遣使分賑存恤給復有差辛亥徵恒州張果授銀青光祿大夫號曰玄通先生三月嚴私鑄錢禁沒京兆商人任令方資財六十餘萬貫夏四月乙未改伊西北庭仍爲節度使廢太廟署以太常奉宗廟庚子准勝州例立表唐州界測候礬影長短乙巳檢覆見禁囚徒京師令兩省及留守天下委諸州刺史各與降罪甲寅北庭都護劉渙謀反伏誅五月戊子李林甫爲禮部尚書同平章事是日大風拔木上以此歲令人巡檢苗稼言多不實親於苑中種麥幸皇太子以下收穫令知稼穡艱難因分賜侍臣及薦宗廟六月遣金吾將軍李佺於赤嶺與吐蕃分界立碑秋七月甲申河南開稻田許豫陳亳等州置水屯遣張九齡充使又遣裴耀卿轉運江淮河南於河口置輸場八月壬寅於輸場東置河陰縣冬十二月戊子朔日食乙巳幽州長史張守珪斬契丹王屈烈及大臣可突于傳首東都餘叛奚皆散走立其酋長李過折爲王二十三年春正月乙亥親耕籍田登樓醑宴大赦令五品以上并刺史薦舉才兼王霸學究天人及堪將帥牧宰者各一人夏五月戊寅宗子請率月俸於興慶宮龍池上建聖德頌秋七月丙子皇太子改名瑛慶王直巳下十四王並改名又封皇子玼儀王珪陳王珙豐王琪恒王璿涼王璿汴王其


榮王琬已下並開府置官屬各食實封二千戶八月戊子免鰥寡孤獨今年地稅之半江淮以南遭水處本道使賑給之九月戊申移泗州就臨淮縣置冬十月辛亥移伊西北庭都護屬四鎮節度突騎施寇北庭及安西撥換城十一月壬申朔日食十二月冊壽王妃楊氏二十四年春正月北庭都護蓋嘉運率兵破突騎施三月乙未始移考功貢舉命禮部侍郎掌領夏四月張守珪遣討擊使安祿山伐奚契丹敗績執送京師上惜其才赦之六月丙午醴泉妖人劉志誠率衆爲亂盡擒斬之是夏大熱道有暍死者秋七月庚子置壽星壇祭老人星及角亢七宿八月戊申朔增宗廟籩豆各十二加親舅小功舅母總麻堂舅袒免服制張九齡進千秋金鑑錄五卷賜書褒獎九月壬午改尚書主爵曰司封冬十月戊申京師地震十一升王寅蕭嵩韓休裴耀卿張九齡並罷以李林甫兼中書令牛仙客兵部尚書同三品知門下省事二十五年春正月置玄學博士每歲依明經舉癸卯拜道士尹愔諫議大夫集賢殿學士兼知史館二月始勅明經對時務策三道進士試經義十帙戊午行和糴法停江淮運癸酉張守珪破契丹餘衆於捺祿山殺獲甚衆三月乙卯河北節度使崔希逸襲破吐蕃於青海西夏四月辛酉監察御史周子諒上書忤旨暴於朝堂決杖死之追謫薦者張九齡荊州長史乙丑以譖廢皇太子瑛鄂王瑤光王琒並爲庶人尋賜死長流妃兄駙馬薛鏞於灤州至藍田驛賜死六月壬戌熒惑犯房至心星越度而過秋七月己卯大理少卿徐皓奏今歲斷死刑五十八幾致刑措有鳥巢寺之獄上特推功元輔封林甫晉國公仙客幽國公九月壬申頒新定令式及事類一

百三十卷於天下冬十月定制立春日迎春於東郊諸月朔於正殿讀時令十二月丙午惠妃武氏薨自是後宮無當意者是歲吐蕃使其大臣屬盧論莽藏來朝貢二十六年春正月乙亥加牛仙客侍中王璵爲祠祭使丁丑迎春東郊祀青帝降天下死罪流餘並放免還京兆新開稻田散給貧民賜百官勲絹長安萬年河南洛陽四縣各與本錢千貫收利充人吏課役天下州縣每鄉置學擇師教授諸鄉貢令就國子監謁先師明經加口試內外八品已下及草澤士有博學文辭者各委司州聞薦二月辛酉廢仙州分其屬縣隸許汝等州三月丙子李出紫微垣歷斗魁癸未京兆地震吐蕃寇河西崔希逸擊破之鄯州都督杜希望攻拔新羅城置威戎軍夏四月己亥朔太常卿韋縉讀時令于宣政殿百寮列坐而聽六月庚子立忠王璵爲皇太子大赦加王府官階賜酺三日秋七月庚辰分置明州九月丙申朔日食庚子始置宥州於舊六胡之地益州長史王昱率兵攻吐蕃安戎城大敗貶高要尉而死冬十月戊寅兩京各建行宮造殿宇千餘間析左右羽林置左右龍武軍以萬騎營隸焉二十七年春正月壬寅榮王琬巡按隴右二月己巳加上尊號開元聖文神武皇帝大赦賜酺五日以後宗廟薦饗並用宗子夏四月丁酉牛仙客兼侍中李林甫爲吏部尚書兼中書令秋七月辛丑熒惑犯南斗八月甲申加封孔子爲文宣王南向被王者服四配十哲皆封侯餘並封伯改襲聖侯爲文宣公九月太常奏舊制三年一禘五年一禘今歲夏旣禘冬又當禘祭數則煩請通計五年一禘一禘從之冬十月毀東都明堂上層改拆下層復爲乾元殿十二月以益州司馬章仇兼瓊權劍

南節度益州大都督府長史是歲蓋嘉運大破突騎施之衆殺蘇祿擒其王吐火仙送于京師二十八年春正月壬寅上元節御勤政樓讌羣臣連夜燒燈會大雪而罷續於二月望夜補之三月丁亥朔日食壬子章仇兼瓊拔吐蕃安戎城分兵鎮守之夏五月乙未以阿史那昕爲十姓可汗六月蓋嘉運節度河西隴右兵馬已而無功九月庚寅封皇孫倣等十九人皆爲郡王冬十月甲子幸溫泉宮度壽王妃楊氏爲道士號太真乙酉吐蕃寇安戎城十二月乙卯突騎施酋長莫賀達干率衆內屬時頻歲豐稔京師米斛不滿二百天下又安雖行萬里不持寸兵二十九年春正月丁酉命兩京諸州各立玄元皇帝廟并置崇玄學博士助教生徒專習老莊列文中子每年准明經例考試許內外官保薦伯叔兄弟子姪堪任刺史縣令者禁九品已下清資官置客舍邸店車坊并土庶奪葬三月吐蕃突厥各遣使來朝秋七月乙卯洛水漲毀天津橋及上陽宮仗舍民廬溺死者衆突厥登利可汗死以北州刺史王斛斯爲幽州節度使安祿山爲營州刺史平盧軍副節度押兩蕃渤海黑水四府經略等使九月大雨雪稻禾偃折命御史中丞張倚賑恤東都河北博洛等二十四州壬申御典慶門試玄學生姚子產元載等四人冬十月戊戌分遣大理卿崔翹等八人往諸道黜陟官吏十二月丁酉吐蕃入寇陷廓州達化縣及振武軍石堡城蓋嘉運不能守女國王趙曳夫及佛逝國日南國各遣使朝獻天寶元年春正月丁未朔陳王府參軍田同秀言玄元皇帝降于丹鳳門通衢告賜靈符上遣使就故函谷關尹喜臺西發得之命建玄元廟於大寧坊擢同秀朝散大夫加尊號爲開元天

寶聖文神武皇帝大赦改元免百姓所欠諸色租稅令所在薦
舉儒學博通文辭英秀軍謀武藝及京官堪任刺史者封狀自
舉二月辛卯享立元皇帝于新廟加號莊子南華真人文中子
通立真人列子冲虛真人庚桑子洞虛真人所著書名為真經
甲午享太廟丙申合祭南郊例推恩改桃林縣為靈寶縣侍中
為左相左右丞相依舊為僕射黃門侍郎為門下侍郎東北二
都皆為京天下諸州為郡刺史為太守凡縣重名者悉改之庚
子進安祿山驃騎大將軍秋七月癸卯朔日食八月丁丑李適
之為左相丁亥突厥阿布思及默啜孫登利可汗之女相率其
黨來降壬辰改林甫耀卿左右僕射適之兼兵部尚書九月辛
卯上御花萼樓出宮女譙毘伽可汗妻可敦及男女等賞賜不
可勝紀丙寅尊立元廟為太立立元皇帝宮冬十月辛丑號

山為會昌山分新豐置會昌縣立祠秦坑儒之所以祀遭難諸
賢賜新成長生殿名集靈臺以祀天神開廣運潭皇太子妃兄
韋堅領江淮租庸轉運使是歲戶部管天下郡三百六十二縣
一千五百二十八鄉一萬六千八百二十九戶八百五十二萬
五千七百六十三口四千八百九十萬九千八百 二年春正
月乙卯作昇仙宮丙辰追尊立元皇帝為大聖祖改兩京崇立
學為崇立館博士為學士三月壬子親祀立元廟取方士言尊
父周上御大夫敬曰先天太上皇母益壽氏曰先天太后仍於
譙郡立廟尊咎繇為德明皇帝涼武昭王曰興聖皇帝改西京
立元廟為太清宮東京為太微宮天下諸郡為紫極宮丙寅廣
濟潭成盛陳舟艦上幸廣運樓觀之擢堅左散騎常侍夏六月
甲戌夜雷震東京應天門災延至延福門火經日不滅冬無雪



石化瑞祥

弘備錄 卷之四
十二月己亥改應天門爲乾元門乙酉安祿山入朝 三載春
正月丙辰朔改年爲載閏二月辛亥有星如月墜於東南作聲
三月以安祿山兼范陽節度使庚午武威郡言番禾縣天寶山
有醴泉湧出嶺石化爲瑞甃堪取以食改名天寶縣夏四月海
賊寇台州遣河南尹裴敦復南海太守劉巨鱗討平之秋八月
丙午九姓拔悉密葉護攻殺突厥烏蘇米施可汗傳首京師冬
十月癸巳幸溫泉宮命潛納太真於宮中號曰娘子十二月甲
寅親祀九宮貴神於東郊大赦是歲令百姓十八已上爲中男
二十三成丁每歲庸調八月起徵至九月畢 四載春正月上
於宮中置壇爲百姓祈福自草黃素置案上俄飛昇天聞空中
語云聖壽延長又以煉成藥置壇上及夜欲收空中語云藥未
須收自有守護羣臣表賀二月丙戌王忠嗣及突厥戰于薩河
丙山敗之秋七月更爲壽王娶郎將韋昭訓女冊以爲妃八月
甲辰冊太真楊氏爲貴妃贈其父玄琰兵部尚書以從兄銛爲
殿中少監釗爲金吾兵曹參軍錡爲駙馬都尉三姊皆賜第京
師是月河南睢陽淮陽譙等八郡大水九月以韋堅爲刑部尚
書楊慎矜租庸轉運使祿山欲希邊寵數侵掠奚契丹及是叛
討破之隴右節度使皇甫惟明與吐蕃戰于石堡城不利副將
褚直廉等死之冬十月改會昌縣爲同京縣置金河陰山二縣
屬單于安北十二月以王鉷爲御史中丞京畿採訪使釗充判
官 五載春正月癸酉貶惟明播州太守尋決死黔中拜王忠
嗣河西隴右朔方河東四節度使夏四月庚寅李適之罷丁酉
陳希烈同平章事五月壬子朔日食秋七月丙子林甫構韋堅
等流臨封郡賜死甥及婿貶之聽皇太子離婚李適之貶宜春

太守仰藥而死九月壬子刻聖容置太清宮併像林甫希烈侍
於側冬十月丁酉改臨淄爲濟南郡是歲贊善大夫杜有隣著
作郎王曾左驍衛兵曹柳勣北海太守李邕淄川太守裴敦復
皆爲林甫構殺六載春正月丁亥享太廟戊子祀園丘大赦
除絞斬刑決以重杖改嫁母服三載士通一藝以上皆詣京師
罷立仗并馬省進馬官置三皇五帝廟以時享祭併章懷節愍
惠莊惠文惠宣懿德與隱太子同爲一廟封中嶽爲中天王南
嶽爲司天王北嶽爲安天王河濱爲靈源公濟濱爲清源公江
濱爲廣源公淮濱爲長源公三月戊戌安祿山兼御史大夫出
入禁中爲貴妃兒自五月不雨至秋七月命諸司錄繫囚庚寅
雨冬十月戊申改溫泉爲華清宮王忠嗣解河東朔方兩鎮任
將軍董延光攻吐蕃石堡城久之不克十一月貶忠嗣漢陽太
守以哥舒翰代之林甫王鉷又構殺楊慎矜及兄慎餘弟慎名
是歲安西四鎮節度使高仙芝及小勃律國戰敗之七載春
正月仙芝入朝獻俘加開府儀同三司三月乙酉有神光照大
同殿柱產玉芝羣臣請上尊號夏四月辛丑以高力士爲驃騎
大將軍時天下無事上欲高居無爲悉以政事委李林甫力士
諫不聽六月賜安祿山實封并鐵券秋八月己亥朔改千秋節
爲天長節萬年縣爲咸寧縣冬十月庚午幸華清宮封貴妃姊
爲韓秦虢三國夫人楊釗判度支事一歲中領十五使十二月
上在華清聞聖祖將降改朝元閣爲降聖閣會昌縣爲昭應縣
山爲昭應山封山神立德公立祠宇是歲哥舒翰築神威軍應
龍城吐蕃不敢近青海八載春正月甲申賜楊釗金紫京官
各給錢絹以備春遊時州縣殷富倉廩充實釗令改糶變爲輕

大同殿生芝

貨悉貯左藏恣上嬉悅引近臣縱觀取之三月朔方節度使張
 降丘於東受降城北築橫塞城夏四月咸寧太守趙奉璋告林
 甫二十罪杖而殺之天下皆言太平請銷兵器著作郎韋子春
 獨不可貶端溪尉五月林甫奏停折衝府上下魚書自此中國
 一無武備矣六月哥舒翰拔石堡城命改為神武軍劍南索磨
 川新置都護府成賜名曰保寧丙寅大同殿又產玉芝上謁太
 清宮冊上聖祖尊號加大道二字高祖五廟皆加大聖二字太
 穆五后皆加順聖二字上尊號加應道二字丁卯御舍元殿受
 冊大赦天下自今每至禘祫並於太清宮聖祖前序昭穆山人
 李渾言太白山金星洞有帝福壽玉版石記命求得之乃封太
 白山神應公金星洞嘉祥公改華陽為貞符縣秋八月戊子停
 別駕置長史冬十月特進何履光率十道兵以伐雲南 九載

春正月庚寅朔始受朝於華清宮諸貴戚爭進食令內侍姚思

藝檢校凡水陸珍羞動數千盤庚戌旱停封西嶽二月壬午楊

釗奏流御史中丞宋渾於嶺南坐以姦賊與吉溫謀傾林甫三

月庚戌改醜使為獻納夏五月庚寅錄囚乙卯進封安祿山東

平郡王節度使封王始此秋七月己亥置廣文館八月祿山兼河北道

採訪處置使九月乙卯處士崔昌士五行應運曆言國家合承

周漢以土代火不合繼周隋間位詔於京城立周武王漢高祖

廟廢韓介鄴公求殷周漢後以為三恪改幡旗皆赤黃色以符

土運冬十月山人王玄翼又言聖祖降于寶仙洞賜以妙寶真

符命張均等求之林甫等各請捨宅為觀上悅十一月己丑改

太清宮及太廟告獻為朝獻巡陵為朝拜告宗廟為奏昭告天

地為昭薦十二月賜楊釗名國忠追復其舅張易之等官爵是

歲安祿山入朝上幸望春宮以待爲起第親仁坊入居之南詔
反陷雲南都督張虔陀死之十載春正月壬辰朝獻太清宮
癸巳朝饗太廟甲午南郊大赦分遣嗣吳王祗等祭嶽瀆海鎮
改傳國寶爲承天大寶二月祿山生日召入禁中川錦繒爲大
襪祿使宮人裹以沐浴賜貴妃洗兒錢丁巳仍兼雲中太守河
東節度使引吉溫爲副使委以軍務三月戊申高仙芝執突騎
可汗及石國夏四月壬午劔南節度使鮮于仲通將兵六萬討
雲南與王閣羅鳳戰于瀘川敗績大將王天運死之秋七月仙
芝及大食戰于怛羅斯城敗績八月陝與廣陵郡皆大風逆船
焚溺數千艘丙辰武庫災燒器械四十七萬安祿山將三道兵
六萬討奚契丹大敗獨與麾下十騎走冬十一月辛未幸楊
國忠宅是歲李林甫兼領安北副大都護朔方節度使楊國忠
兼領劔南節度使十一載春二月癸酉用楊國忠言罷禁惡
錢三月奉信王阿不思與祿山同討奚契丹不協恐其害已叛
歸漠北祿山懼不敢進丙午制自今遇朔望太廟每室薦牙盤
食五日一開室門灑掃改吏部爲文部兵部爲武部刑部爲憲
部將作爲大少二監夏四月王鉞謀逆賜死以楊國忠爲御史
大夫兼京兆尹林甫請解朔方節制薦安思順代之八月己丑
復幸左藏庫賜羣臣帛有差九月甲寅改諸衛士爲武士冬十
一月乙卯李林甫死庚申楊國忠爲右相兼文部尚書薦吉溫
爲御史中丞十二月哥舒翰安祿山安思順俱入朝上使高力
士宴之於城東十二載春二月癸未追削林甫在身官爵剖
棺以庶人禮葬流其子岫及宗黨李復道等五十餘人夏五月
復所廢三恪二王秋七月壬子勅天下齊民不得預鄉貢須補

國子學生方許貢舉八月京城霖雨出太倉粟減價糶與貧民
令大理疏決囚徒冬十月戊申幸華清宮三夫人皆從十二月
改橫密城爲天德軍十三載春正月丁酉朔上受朝於華清
宮之觀風樓乙巳祿山入朝拜左僕射賜實封千戶二月癸酉
朝獻太清宮上立帝尊號曰大聖祖高上大道金闕元天皇
大帝甲戌朝饗太廟上高祖尊號神堯大聖大光孝皇帝太宗
尊號文武大聖大廣孝皇帝高宗尊號天皇大聖大弘孝皇帝
中宗尊號太和大聖大昭孝皇帝睿宗尊號玄真大聖興孝皇
帝乙亥御興慶殿受徽號曰開元天地大寶聖文神武孝德證
道皇帝大赦改獻陵等五署爲臺令丞并文武各照品加爵賜
階大酺三日戊寅冊楊國忠司空受日天雨黃土霑於朝服又
超資肩授祿山將士爲將軍者五百餘人中郎將二千餘人三
月丙午御躍龍殿門張樂宴相臣文武以下各賜絹綵綾羅有
差于戌北庭都護程千里生擒阿布思獻于勤政樓下斬之夏
五月災惑守心五十餘日六月乙丑朔日食不盡如鈞劍南留
後李處攻南詔大敗被擒舉軍皆沒秋八月丁亥久雨東都瀝
洛暴漲漂沒一十九坊罷陳希烈以韋見素爲武部尚書同平
章事關中大饑出太倉米百萬石開十場賤糶以濟貧民是秋
試四科制舉人于勤政樓策外加詩賦各一首制舉加詩賦始此是載
戶部計見戶九百六十一萬九千二百五十四口五千二百八
十八萬四百八十八十四載春三月丙寅宴羣臣於勤政樓
奏九部樂上賦柏梁體羣臣皆和癸未遣給事中裴士淹等巡
撫河南河北淮南等道二月安祿山使副將何千年奏請蕃將
三十二人以代漢將韋見素奏其必反決不可從不聽俄以其

子慶宗在京尚宗女有期手詔觀禮祿山辭疾不至秋七月表請獻馬三千匹每匹執鞵夫二人各遣蕃將部送河南尹達奚珣疑有變奏令俟冬官自給夫無煩本軍上意稍寤冬十月壬辰幸華清宮甲午頒御注老子并義疏於天下十一月丙寅祿山反率蕃漢兵自幽州南向詣關以誅國忠爲名上聞於行在拜郭子儀朔方節度使封常清范陽平盧節度使令詣東京募兵斷河陽橋始圖禦備戊寅還京誅安慶宗甲寅拜榮王琬爲元帥副以高仙芝募京城民十一萬號天武軍鎮陝十二月丙戌朔上御勤政樓臨送丁亥祿山陷靈昌郡渡河辛卯陷陳留甲午陷滎陽丙申封常清與戰武牢敗績奔陝令仙芝棄城保守潼關丁酉陷東京達奚珣叛降己亥常山太守顏杲卿起兵復趙魏等十四郡殺賊將李欽奏執何千年高邈送京師辛丑詔皇太子統河隴兵副以哥舒翰守潼關甲辰子儀敗賊將高秀巖于河曲辛亥榮王琬薨時河北郡縣皆已從賊上聞平原太守顏真卿等各起兵始驚嘆真源令張巡與單父尉賈贛合擊令狐潮軍聲大振十五載春正月乙卯御宣政殿受朝祿山於東京僭號庚申以李光弼爲河東節度使轉李隨鎮河南許遠爲睢陽太守以討之壬戌賊將蔡希德史思明陷常山杲卿及履謙死之復陷魏鄴廣平鉅鹿趙郡上谷博陵文安信都九郡進圍饒陽甲子加哥舒翰左僕射同平章事乙丑安慶緒犯潼關翰擊退之乙巳加真卿戶部侍郎嗣吳王祗河南都知兵馬事及賊將謝元同戰于陳留敗之二月丙戌光弼復常山執安思義遂與子儀東出井陘及思明戰大破之丙辰誅賊黨安思順安元貞三月壬午拜光弼御史大夫轉鎮河北乙酉真

卿爲河北採訪使擊拔魏郡己亥改常山爲平山郡房山爲平山縣鹿泉爲獲鹿縣鹿城爲束鹿縣夏四月丙午來瑱爲潁川太守兼招討使光弼子儀又破思明於九門進拔趙郡五月戊午河南節度魯吳與賊將武令珣戰于滎水上大敗被執賊圍南陽詔嗣虢王巨自藍田出師往救賊解圍走六月癸未朔真卿破賊將袁知泰於堂邑河北招討賀蘭進明入收信都庚寅詔促哥舒翰將兵出關與賊將崔乾祐遇于靈寶西原戰敗死者十六七辛卯翰至潼關蕃將火拔歸仁執以降賊關門不守京師大駭河東華陰馮翊上洛等郡皆委城遁走甲午將謀幸蜀詔以親征爲言命崔光遠留守京城遣令誠掌宮闈管鑰隨獻于賊乙未凌晨上獨與貴妃并姊妹自延秋門出扈從惟國忠見素力士及太子親王妃主并皇孫以下未及平明渡便橋

國忠欲斷橋上思繼來者命緩之辰時至咸陽望賢驛官吏駭散無復供頓亭午未進食有父老獻麩上欲得飯獻者相繼俄尚食持御膳至命頒給從官而後食是夕次金城縣吏民咸道令魏方進男允招誘得智藏寺僧進芻粟行從方給丙申次馬嵬驛諸衛頓軍不進將軍陳玄禮奏誅國忠并賜貴妃死丁酉發馬嵬百姓扳皇太子因留不行戊戌次扶風軍士各懷去志至出醜言玄禮不能制會益州貢春綵上命悉置于庭召諸將與別曰卿等陳力久矣今蜀路險狹恐難供承甚知卿等不得別父母妻子朕亦不及親辭九廟卽宜分取各圖去就朕獨與子弟中官相隨言發涕出衆咸俯伏泣曰死生願從自此浪言稍息庚子以潁王璩爲劍南節度大使司勳郎中崔圓副之監察御史宋若思加中丞充置頓使常諤充巡閣道使並令先發

辛丑駕輿夕次陳倉壬寅次散關分部下軍爲六命壽王瑁等前後左右相次分統丙午至河池郡聞奏劔南歲稔民安儲供無闕上大悅卽拜中書侍郎同平章事充蜀郡長史知節度事以前華州刺史魏犀爲梁州長史時賊將孫孝哲已陷長安秋七月壬戌次益昌縣甲子次普安郡憲部侍郎房瑄入見與語甚悅拜吏部尚書同平章事丁卯詔皇太子充天下兵馬元帥統朔方河東河北平盧等兵馬收復兩京宋王璘等皆爲節度大使璘江陵都督統山南東江南西路并黔中盛王琦廣陵大都督統江南東并淮南河南等路豐王珙武威郡都督領河西隴右安西北庭等路中外尚未知車駕所向衆心惶駭及聞是詔遠近相慶庚午次巴西太守崔渙奉迎卽授門下侍郎同平章事韋見素爲左相庚辰至蜀郡八月癸未朔御府衙肆赦癸巳靈武使至始知皇太子卽位丁酉受冊稱上皇改詔稱誥已亥臨軒冊命皇帝遣韋見素房瑄崔渙等往使自今軍國大事先取皇帝處分然後奏知候克復兩京朕當怡神偃息明年收復兩京遣中使啖廷瑤奉迎冬十月丁卯發蜀郡十一月丙辰次鳳翔十二月丁未入京御大明宮舍元殿見百寮入居興慶宮後移幸西內之甘露殿崩之日壽七十八享國四十四年尊謚曰至道大聖大明孝皇帝廟號玄宗先是謁橋陵見金粟山崗有龍盤鳳翥之勢復近先塋謂侍臣曰吾千秋後宜葬此地得奉先靈不怠孝敬代宗追奉先旨葬于其地名曰泰陵

冊曰盛矣開元彌亮多賢因心載錫孝治光天天寶一變妖淫濁亂丘墟蕩覆流離屯難吁嗟一身若兩截塵鑒觀浩嘆撫卷懷人

同月五日晚涼向東定句之會當發止之


弘簡錄卷之五
武取皇帝與公然發奏朕對京師兩京風雷會轉離感以辛卯
支調神冊命皇帝徽章長素冠事並進御封其自合軍國大事
日靈延封至故朕皇太子嗚呼丁酉受冊稱土皇與諸御帶日
宮遊幸西內之甘露殿俄之日壽十八享國四十四年尊
大鳳曆十二月丁未入京曆大則宮舍云與使百餘人無典與
封兩京畿中與與我罪奉殿十日丁與然發奏十一日丙辰
武取皇帝與公然發奏朕對京師兩京風雷會轉離感以辛卯
支調神冊命皇帝徽章長素冠事並進御封其自合軍國大事
日靈延封至故朕皇太子嗚呼丁酉受冊稱土皇與諸御帶日

明刑部員外郎仁和邵經邦弘齋學

皇清翰林院侍講學士四世孫遠平校閱

天王 唐一之七

肅宗皇帝諱亨玄宗第三子母妃楊氏以景雲二年某月乙亥
生初名嗣昇二歲封陝王五歲領安西大都護河西四鎮諸蕃
落大使仁愛英悟得之天然及長聰敏強記屬辭典麗耳目聽
覽不復遺忘開元中封忠王改名浚領朔方大使單于大都護
因奚契丹犯塞遙領河北道元帥信安王禕為副御史大夫李
朝隱京兆尹裴仙先等八人為行軍總管以討之行日設次光
順門命與百僚相見左相張說退謂學士孫逖韋述以為社稷
之福英姿穎發儀表非常雅肖太宗及諸將有功歸之加授司



徒改名興立爲皇太子又名紹嫌與宋太子同復改今名上初
名李林甫議值壽王瑁母武惠妃方寵希旨以對立後懼不利
已數起韋堅柳勣獄以搖之更遭楊國忠馮勢褻穢懼上英武
幾危者數四嘗密奏祿山有反相不聽及議親征玄宗語宰相
朕去秋已欲傳位值水旱不果今且令太子監國待事甫平卽
將高枕無爲國忠懼與貴妃謀間其事遂不行祇命總率諸軍
隨幸蜀留在後宣諭百姓父老數千遮道泣曰臣等世爲唐民
願戮力一心爲國討賊請留太子以圖收復若同上入蜀中原
倚誰爲主玄宗聞之喜爲天啓令力士與壽王送其內人及服
御等物留後軍二千及飛龍廐馬以從仍令口宣汝好去百姓
屬望慎勿違之其西北諸蕃吾撫之厚今國步艱難必得其用
汝宜勉之莫以吾爲意又諭父老曰太子仁孝可奉宗廟汝曹
善輔之時以初聞遠親涕泣不從引馬欲西建寧王倓與李輔
國執轡而諫收邊兵復二京此爲大孝溫清定省兒女之態不
足爲牽乃回至渭北從行惟廣平建寧二王并將士纔三千人
時便橋已斷無舟可渡號令水濱百姓願歸者三千餘遇潼關
散卒誤以爲賊旋乃知之收其餘衆自奉天而北夕次永壽百
姓遮道獻牛酒有白雲起西北長數丈如樓閣之狀議者以爲
天子之氣衆尚未知所適建寧勸趨朔方以嘗爲節度道且近
士馬全盛從之戊戌至新平郡晝夜奔馳三百餘里士衆器械
亡失過半所存僅一旅己亥至安定郡斬棄城新平守薛羽保
定守徐穀庚子至烏氏驛次彭原太守李遵率兵迎謁隨進服
御糧糗募甲士四百率私馬以助軍辛丑至平涼得監牧馬數
萬匹軍遂振三輔百姓知賊已據長安哄言大軍卽日隨太子

至賊西北望塵起時或奔走戊申陳倉令薛景仙謀取扶風郡人康景龍殺僞官慰薛總等率衆守之關輔豪右皆謀殺賊其勢少歛駐平涼數日會杜鴻漸魏少遊崔漪等遣判官李涵奉牋來迎備陳招集兵馬并倉儲庫甲之數上大悅司馬裴冕赴關相遇亦勸治兵靈武以圖進取心頗然之遂發平涼有彩雲浮空白鶴前引出後見所憩解宇黃龍冉冉騰空而去行至豐寧南觀黃河險固欲整兵北渡權保于此忽大風飛沙跬步之間不辨人物反向靈武風沙頓止天地廓清秋七月辛酉抵焉少遊預頓供帳悉皆完備冕與鴻漸從容進曰寇逆亂常毒流函谷主上倦勤大位蜀川阻險奏請路絕宗社神器須有所歸萬姓顛顛思崇明聖天意人事不可固違伏願殿下順其樂推以安社稷答以公等何急宜俟平寇奉迎鑾輿從容儲闈侍膳左右豈不樂哉冕等凡六上牋辭情激切不獲已乃從以甲子日卽皇帝位冕等跪上千萬歲壽曰自從今日宗社再安游宇更生臣稽首舞蹈上獻欷流涕卽日上表入蜀後御靈武南門下制曰朕聞聖人畏天命帝者奉天時知皇靈眷命不敢違而去之知曆數匪常不獲已而當之乃者羯賊煽亂天未悔禍聖皇久厭大位思傳眇身軍興之初已有成命予恐不德罔敢祗承今羣工卿士僉曰孝莫大於繼德功莫大於中興以朕治兵朔方務其大者須安兆庶之心勉順羣臣之請敬崇徽號曰上皇天帝昭告天地大赦天下改是載爲至德元載以杜鴻漸爲兵部郎中崔漪爲吏部郎中並權中書舍人裴冕爲中書侍郎同平章事兵馬使周泌彭元暉與前蒲州刺史呂崇賁各拜河西隴右關內節度使改扶風爲鳳翔郡靈武爲大都督府上縣

為望中縣為上任薛景仙於鳳翔郭英又於天水皆為太守丁卯逆賊害霍國長公主并永王妃侯莫陳氏義王妃闞氏陳王妃韋氏信王妃任氏及駙馬楊鼎等八十餘人甲戌賊黨同羅部五千餘自西出降己卯京兆尹崔光遠長安令蘇震等率官吏殺賊數千級赴于行在八月壬午子儀光弼合破賊於嘉山詔令旋師各屯河北拜子儀兵部尚書依前靈州大都督府長史光弼戶部尚書同平章事兼太原尹北京留守廼紇吐蕃各遣使請和親願助討賊宴賜遣之上所奉表已達上皇遣奉冊書及傳國寶來赴九月壬辰幸彭原郡給復百姓二載郡同六雄縣昇紫望封故邠王守禮男承案為燉煌王令僕固懷恩送至廼紇和親冊可汗女為昆加公主納以為妃丙子幸順化郡見素等至己卯斬潼關敗將李承光於蘆下十月辛巳朔日食既癸未以軍興用度不足命第五琦立權鹽法權賣官爵及度僧尼上素知房瑄名拜為兵馬元帥王思禮副之分兵五萬為三命楊希文劉貴哲李光進各將一軍收復京師辛丑瑄與賊將安守忠戰于陳濤斜敗績希文貴哲等降賊瑄乃奔還顏真卿棄平原渡河於是河北盡陷十一月辛亥河西地震有聲地裂廬舍張掖酒泉尤甚戊子廼紇引軍赴難與子儀同破賊黨三千餘眾於河上詔宰相權渙巡撫江南補授官吏十二月戊子以王思禮為關內節度郭英又為鳳翔太守諫議大夫高崇為廣陵長史淮南節度兼採訪使賊將阿史那承慶陷潁川郡執太守薛愿長史龐堅甲辰永王璘反擅領舟師下廣陵至德二載春正月庚戌朔上在彭原受朝賀遣表入蜀每有銜命戒途將發必肅恭拜跪涕泗漣而左右侍臣罔不感動上皇

下書以爲信。可以光宅寰宇，永綏兆民。其令天下有孝悌彰聞，堪旌表者，郡縣長吏採訪來奏。甲寅，襄陽太守李暉爲蜀郡長史，與將作少監魏仲犀各充劔南并山南節度使。永王傅劉彙爲丹陽太守兼防禦使，憲部尚書李麟同平章事。乙卯，安慶緒弑祿山，辛酉置江寧縣。李輔國譖殺建寧王倓。甲子，幸保定郡。丙寅，武威郡九姓商胡安門物等叛，殺節度使周泌判官崔柎。蜀郡健兒賈秀謀逆，文城太守齊莊將軍席元慶等各討平之。二月戊子，幸鳳翔郡，議大舉，括公私馬，貶給事中李廣、江華太守李光弼、大破蔡希德於城下，斬首七萬，及軍資器械。郭子儀又破崔乾祐於潼關，收河東郡。永王璘敗奔大庾嶺，洪州刺史皇甫侁殺之。三月癸亥，河西自去冬地震，至是方止。辛酉，裴冕罷，以韋見素同平章事，致仕。苗晉卿爲左相，遣給事中南巨川往吐蕃議和親。癸亥，大雨至。癸酉，不止。詔疏理刑獄。甲戌，方止。夏四月戊寅朔，拜郭子儀司空，李光弼司徒，統諸節度。乙酉，歲星太白熒惑集于東井。五月癸丑，子儀與安守忠戰于清渠，敗績，退保武功，表讓司空。許之。丁巳，房瑁罷，以諫議大夫張鎰爲中書侍郎同平章事。杜鴻漸節鎮河西。庚申，追贈母妃楊氏爲元獻皇太后。秋七月己酉，太白經天。庚戌，夜蜀軍人郭千仞謀逆，李暉討平之。丁巳，賊將安武臣陷陝郡。八月甲申，崔澳補餘杭太守兼江東採訪防禦使。己丑，張鎰兼河南節度採訪處置等使，賊攻靈昌郡，援兵不至。太守許叔冀拔衆投睢陽。癸巳，大閱諸軍。丁酉，改雍縣爲鳳翔縣。陳倉爲寶雞縣。閏月辛未，賊攻鳳翔節度使崔光遠行軍司馬王伯倫判官李椿率衆禦退，乘勝至中渭橋，殺守橋賊千人，追擊入苑中。伯倫血戰而死。椿力

窮被執賊大軍屯武功者聞之燒營而遁自是不敢西侵九月
丁丑上黨節度使程千里與蔡希德戰被擒燉煌王承寀還君
宗正卿與廻紇葉護太子率兵四千助國討賊丁亥元帥廣平
王統朔方安西廻紇南蠻大食衆二十萬東向討賊用李泌參
謀以李嗣業居前郭子儀居中王思禮居後屯於香積寺西北
壬寅與賊將安守忠李歸仁等戰大勝斬首六萬癸卯入收西
京甲辰捷書至行在百寮稱賀卽日轉告上皇遣裴冕入京啓
告郊廟社稷冬十月乙巳朔遣崔光遠灑掃宮闕撫安百姓選
今月十九日還京應緣供頓務從減省癸丑睢陽陷張巡姚訔
許遠皆死之其大衆保陝者復爲元帥及子儀等大敗于新店
斬首十萬橫屍三十里慶緒等悉奔河北壬戌廣平王入東京
陳兵天津橋南民衆歡呼陷賊宮達奚珣陳希烈張瓘等三百
餘人素服待罪命中丞崔器鞫問禁之于獄癸亥上白鳳翔還
京給復五載遣兒素等入蜀奉迎上皇丙寅至望賢宮復得東
京捷書大喜丁卯入長安士庶泣拜不圖今日復見天自上爲
感惻素服哭於九廟焚所三日入居大明宮新置九廟主成告
享已巳以河南河東郡縣皆平封廻紇葉護爲忠義王約每年
送絹二萬匹至朔方交授十一月壬申朔上御丹鳳樓下制單
恩遠近改宮省門帶安字者爲御史大夫嚴莊來降以爲司農
卿十二月丙午上皇至自蜀上具法駕幸咸陽望賢宮奉迎上
皇御南樓上望樓辟易下馬趨進蹈舞稱慶上皇下樓上旬旬
捧其足涕泗嗚咽不能自勝扶持御殿親自進食搯馬上爲攬
轡上皇撫背止之乃乘馬前導自開遠至丹鳳門老幼夾道得
覩二聖若不勝喜百寮班舍元殿庭伺上皇御殿苗晉卿率以

稱賀禮畢詣長樂殿謁九廟神主上請歸東宮遣高力士再三諭止甲寅拜晉卿中書侍郎同平章事大赦天下加封僭楚王實封二千戶郭子儀代國公實封一千戶韋見素幽國公高力士齊國公陳玄禮右龍武大將軍各實封三百戶田長文張崇俊杜休祥各二百戶冕翼國公李輔國成國公李遵鄭國公僕固懷恩豐國公李嗣業號國公李光弼薊國公王思禮霍國公來瑱穎國公魯吳岐國公崔光遠鄴國公李光進范陽郡公苗晉卿韓國公李麟襄國公崔圓趙國公張鎬南陽縣公並加實封復所改百司額及郡與官名一依故事改鳳翔為西京西京為中京蜀郡為成都府官寮並同三京名號追贈李愬盧奕顏杲卿袁履謙許遠張巡張介然蔣清龐堅等官仍訪子孫加等號錄賜文武三品已上爵一級四品以下一階大酺五日進封皇子係趙王僅彭城王儁兗王佺涇王橫襄王侶興王僅杞王侗定王已丑僞范陽節度使史思明籍兵八萬與僞河東節度使高秀巖並送表降庚午斬達奚珣等一十八人賜陳希烈等七人自盡張均免死配流合浦

乾元元年春正月戊寅朔上皇御宣政殿授皇帝傳國受命寶符加號光天文武大聖孝感皇帝上因辭大聖二字不允乙酉出宮女三千庚寅大閱於含元殿庭庚子開張良娣為淑妃二月癸卯朔僞淄青節度熊元皓來降用為河北招討使并授子昱官爵乙巳上朝興慶宮奉冊尊上皇徽號曰太上至道聖皇大帝丁未大赦改元仍載為年功臣依品各官一子追贈死事王臣減陷賊官罪一等醫士入仕者同明法例處分三月甲戌改封僭成王乙亥置山南東道河南淮南江南諸節度使補官

員六十人辛卯置太史監就奉寧坊張守珪宅改名司天臺夏四月癸卯嗣虢王巨尹河南充東京留守京畿採訪處置等使已酉冊淑妃張氏爲皇后辛亥新廟成備法駕迎神主納之甲寅享九廟有事圓丘大赦戊辰上進鍊石英金龜於興慶宮五月壬午停採訪黜陟置觀察使癸未夜月掩心前星戊子張鎰罷以崔光遠爲河南節度使李廣琛爲青徐等五州節度使令赴河南行營會計討賊庚寅立成王爲皇太子己未崔圓李麟罷以王璵爲中書侍郎同平章事上嘗不豫璵請立太一神壇於圓丘東命璵攝行祠事癸丑夜月入南斗魁戊午勅諸司減原僞授官等科條其事狀稍輕者並與釋放史思明復反殺范陽副史烏承恩秋七月丙戌鑄乾元重寶錢用一當十與開元通寶同行丁亥上妹寧國公主出降廻紇八月甲辰上皇誕節宴百官於金明門諸將皆來朝庚寅大舉討安慶緒於相州命子儀光弼思禮叔真廣琛魯炆及興平李奐平盧董秦北庭李嗣業等九節度之師合步騎二十萬始立觀軍容之名拜魚朝恩爲使癸巳大食波斯國兵衆寇廣州刺史韋利見棄城遁冬十月乙未以濮州刺史張方須爲廣州都督兼節度使子儀破賊十萬收復衛州獲安慶和甲寅上皇幸華清宮上送於灞上壬申王思禮破賊二萬於相州十一月丁丑子儀收魏州以崔光遠爲刺史十二月平盧軍節度使王志玄卒上遣中使撫慰將士就察軍中所欲立者授以旌節高麗人李懷玉殺志玄子推副使侯希逸卽以委之節度使由軍廢立始此庚戌王師圍相州慶緒食盡求救史思明率衆來援丁卯思明復陷魏州光遠出奔是歲饑禁酤酒麥迴紇黑衣大食康國吐火羅葉攝烏利多并九

天正唐七

國首領皆來朝貢願助討賊令赴朔方行營衛滑等州婦人侯
四娘等歃血請同赴義補爲果毅

二年春正月己巳朔御含元殿受尊號加乾元二字史思明亦
於魏州自稱燕王僭立年號丁丑上祀九宮貴神宿齋壇所戊
寅耕籍田丙申李嗣業卒于軍二月壬子望月蝕既止皇后上
尊號丙辰月犯心大星三月己巳皇后祀先蠶壬申子儀等與
思明戰不利九節度兵皆潰子儀斷河陽橋以保東京思明還
屯鄴南數安慶緒弑逆大罪并崔孝哲崔乾祐皆殺之甲午兵
部侍郎呂諲同平章事乙未苗晉卿王興崔轉京兆李峴吏部
尚書禮部李揆中書侍郎并戶部侍郎第五琦並同平章事丙
申拜子儀山東河南等道兵馬元帥兼判東京留守尚書省事
夏四月丁酉朔王思禮破賊萬人於潞城縣東直干嶺壬寅下

詔殘妖未殄國步猶艱自今常膳及服御等物並從節減停諸
造作并口勅處分以後非正宣並不得用中外諸務各歸有司
罷英武及六軍諸使追攝須經臺府如處斷不平具狀聞奏自
文武五品以上各舉賢良方正直言極諫一人兩省官十日一
上封御史臺彈事不須進狀其體至公以康庶政乙巳史思明
僭號稱帝五月丁亥御宣政殿試文經邦國等四科舉人秋七
月辛巳趙王係爲天下兵馬元帥丁亥名子儀還京師以光弼
兼幽州長史河北兵馬元帥八月乙亥襄州將康楚元逐刺史
王政據城自守九月甲午賊帥張嘉延復亂襲破荆澧朗復郢
陝歸等州商州刺史韋倫討平之戊辰更鑄重輪大錢用一當
五十以二十二斤成貫庚寅思明入洛陽陷汝鄭滑等州光弼
移軍河陽與諸將併力冬十月乙巳大破之十二月癸巳朔神

策將衛伯玉破賊於陝西疆子坂

上元元年春正月辛巳進光弼太尉兼中書令子儀邠寧鄜坊
兩道節度使三月甲申建蒲州為河中府同京兆設置官吏夏
四月戊申襄州軍亂殺節度使史翺部將張維瑾據州叛以來
填充山南東道襄鄧等十州節度觀察處置等使以討之丁巳
夜彗長四尺出東方婁胃間閏月辛酉朔彗出西方長數丈己
卯大赦改元京師大雨是月不止米踊貴餓死委路至人相食
五月壬子呂諲罷癸丑以劉晏為戶部侍郎勾當度支鑄錢鹽
鐵等使六月乙丑減重輪錢一當三十開元錢一當十渾羌寇
鳳翔崔光遠與戰于涇隴敗之秋七月丁未李輔國遷上皇于
西內丙辰流高力士巫州王承恩播州魏悅漆州陳玄禮致仕
九月甲午改江陵府為南都官吏設置並同河中復南京為蜀
郡冬十一月乙巳李光弼拔懷州擒安太清揚州都統劉展

揚潤昇等州

二年春正月甲午上不豫皇后刺血寫經命諸司疏繫囚乙卯
平盧兵馬使田神功生擒劉展揚潤平以崔圓為揚州長史二
月己未党項寇寶雞殺鳳州刺史蕭悅李鼎邀擊之辛未夜月
食既戊寅光弼與思明戰于北邙山敗績走保聞喜朝恩伯玉
走保陝州河陽懷州復陷京師戒嚴上表自劾讓太尉中書令
授侍中河中尹晉絳節度觀察等使癸未李揆與呂諲不悅貶
為袁州長史拜蕭華中書侍郎同平章事三月甲子史朝義剋
陝及青兗二州衛伯玉尚衡熊元皓連敗之遂殺思明白立夏
四月己未裴遵慶為黃門侍郎同平章事壬午梓州刺史段子
璋反襲破遂州殺刺史嗣號王巨東川節度李奐戰敗奔成都

五月甲午思明將合孤彰來降授御史中丞依前節度滑魏德
貝相六州乙未崔光遠與李奐擊敗段子璋於綿州擒斬平之
李光弼來朝復太尉充河南副元帥淮南山南東五道行營都
統鎮臨淮秋七月癸未朔日食既大星皆見甲辰王芝生延英
殿梁一莖三花上為作詩八月癸丑朔加李輔國兵部尚書自
七月霖雨至是方止上以災變屢見命於三殿置道場以宮人
為佛菩薩力士為金剛神王召大臣膜拜九月壬寅制去尊號
乾元大聖光天文武孝感等字唯稱皇帝乾元年號亦罷但稱
元年月以斗柄所建為名建子月為歲首停四京號
元年建子月上受朝賀如正旦儀遂朝上皇於西內癸巳曹州
刺史常休明敗賊將薛萼丙午衛伯玉敗史朝義于永寧己酉
朝獻太清宮庚戌享太廟及元獻皇后建丑月辛亥南郊己未
來瑱及史朝義戰于汝州敗之乙亥侯希逸又敗賊將李懷仙

於范陽建寅月甲申追冊靖德太子琮為皇帝妃竇氏為皇后
丙戌盜發敬惠二陵甲辰李光弼克許州戊申史朝義陷營州
建卯月辛亥大赦癸丑河東軍亂殺節度使鄧景山乙丑河中
亦亂殺李國禎戊辰淮西節度使王仲昇及賊將謝欽讓戰于
申州敗績庚午復起郭子儀朔方河中諸軍行營副元帥封汾
陽王壬申鄆州刺史成公意及党項戰敗之建辰月丙戌夜月
有白冠甲午党項奴刺寇梁州刺史李勉棄郡走丙申又寇奉
天時上不豫百寮於佛寺齋僧丁未放還左降官并一切流人
天下見禁繫囚無輕重一切釋放建巳月庚戌朔史朝義寇澤
州刺史李抱玉敗之壬子楚州刺史崔旆獻定國寶玉十三枚
因言楚者太子所封宜改是年為寶應元年建巳月仍為四月

餘並依常甲寅上皇崩于神龍殿上聞之不勝哀悸因茲大漸
乙丑詔皇太子監國丁卯帝崩于長生殿在位七年壽五十二
諡曰文明武德大聖大宣孝皇帝廟號肅宗葬建陵

冊曰靈武肇基丘民效順民重君輕兩言益信社稷之功
默存大易長子帥師丈人貞吉孰云非道而能自立千古

斯文同臻至一 七月九日午後句之新原稿至

天王 唐一之八

代宗皇帝諱豫肅宗長子母章敬吳太后以開元十四年十二
月十三日生于東都上陽宮初名俶自幼好學尤專禮易年十
五封廣平王仁孝溫恭動必由禮及長字量弘深寬而能斷喜
懼不形於色玄宗特鍾愛之從狩靈武拜天下兵馬元帥推心
示信招懷流散比至彭原兵衆數萬值房琯子儀繼戰不利賊
鋒方銳屢來寇襲乃選求勇幹頻挫其鋒上慮獲寧士心大振
及師進討百官辭送步出闕門方始乘馬迴紇葉護入助接以
優禮恩信素結香積之戰大得其力既收京城令行禁止民庶
安堵秋毫不犯聞賊殘衆保陝即日長驅東趨號洛復大克捷
殲逆黨十之七八河南底定兩都恢復在於數旬推功不受立
爲皇太子以豫州獻嘉禾改今名值兩宮不豫往來侍疾躬嘗
藥膳衣不解帶久之承命監國流涕而從張皇后以無子懼其
功高難制陰引越王係於內將圖廢立矯名入宮內使程元振
知其謀勒兵凌霄門以俟其至衛從入飛龍廐至夕閉皇后于
別殿收係及內宦朱光輝馬英俊等鎖之伺肅宗崩元振等卽
迎於九仙門見羣臣戊辰發喪己巳柩前卽皇帝位乙亥進李
輔國號尚父擢元振右監門將軍流朱光輝啖庭璠陳仙甫等

於黔中五月己卯朔又進輔國司空兼中書令庚寅追尊母爲
皇太后辛卯議行三年喪宰臣晉卿等請遵遺制至三十表方
允丙戌聽政改封寧鄯王适魯王李光弼臨淮王貶蕭華陝州
司馬以戶部侍郎元載同平章事改乾元大小錢並準當一民
始安之丁酉大赦加諸道節度使實封賜立功人號實應功臣
內外文武照品加爵級如故事停諸州防禦使進封子邈鄭王
迴韓王追復庶人王氏爲皇后瑛瑤瑒皆返舊封昭雪棣王琰
承王璘王寅來瑱復任襄州刺史長流故刺史裴拔費州賜死
六月己酉朔臨于西宮不視朝以迄山陵凡辭見有事先臨而
後詣改豫州爲蔡州以避上名辛亥廢皇后張氏與越王係充
王儻皆爲庶人辛酉封李輔國博陵王出居外第秋七月辛巳
封魚朝恩馮翊郡程元振保定郡皆開國公庚寅郭子儀自河
中來朝留于京師是月不雨至于八月癸丑方雨庚午夜西北
有赤光亘天貫紫微漸移東北彌漫半天台州賊袁晁反九月
丁丑朔進元振邠國公甲申裴冕議山陵事與元振異貶爲施
州刺史甲午太州至陝二百餘里黃河清流輔國黨韓穎劉烜
于嶺表尋賜死丙申遣御史大夫尚衡宣慰廻紇登里可汗率
衆助國王寅大閱冬十月辛酉詔雍王适統河東朔方及廻紇
兵十餘萬討史朝義丁卯夜殺李輔國戊辰諸軍進發同會于
陝壬申次洛陽北郊甲戌戰于橫水俘斬六萬朝義奔冀乙亥
收東京以郭英又權留守丁酉僞節度張忠志來降賜姓名李
寶臣李懷仙斬朝義來獻河北悉平

廣德元年春正月劉晏爲吏部尚書同平章事閏月戊申分河
北地爲六授諸降將李寶臣領成德李懷仙領幽州薛嵩領相

衛等州皆節度使田承嗣魏博都防禦使二月甲午迴紇歸國
三月甲辰朔襄州兵馬使梁崇義殺大將李昭據城自固朝廷
不能制命為山南東道節度留後丁未以兩朝歸附罷晦朔朝
百寮素服詣延英門通名起居夏四月戊寅朔改太州為華州
太陰為華陰縣庚辰光弼將張伯儀生擒袁晁浙東平六月癸
未封李抱玉武威郡王檢校司空河中王昂封邠國公檢校刑
部尚書同華李懷讓檢校工部尚書同日入省甲午朝恩自陝
州入朝上御達禮門同百寮往觀秋七月戊申羣臣同上尊號
曰寶應元聖文武皇帝壬子大赦改元祿山思明親族一切原
免租稅依舊每畝二升加元帥雍王尚書令副帥懷恩太保進
登里可汗功臣皆賜鐵券藏名太廟畫像凌煙閣丁巳懷恩子
瑒兼御史大夫充朔方行營節度吐蕃大入河隴陷秦成渭三
州復入大震關陷蘭鄯河鄯洮岷等州崑崙有隴右之地九月壬
戌朔懷恩拒命遣裴遵慶往汾州宣撫己丑吐蕃寇涇州刺史
高暉以城降因為鄉導冬十月辛未遂犯京畿自司竹園渡渭
循南山而東丙子駕幸陝州六軍逃散射生將王獻忠叛賜豐
王璿等還迎之郭子儀往商州收合散卒得四千人丁丑駕次
華州官吏藏竄無復供擬會魚朝恩領神策軍自陝來迎乃幸
其軍戊寅吐蕃入京師立廣武王承宏為帝逼前翰林學士于
可封為制書辛巳駕至陝六軍使張知節烏崇福長孫全緒等
率兵繼至軍威遂振從官亦由南山諸谷以赴行在鄜坊節度
判官段秀實說白孝德引兵赴難與子儀合勢進擊晝則鳴鼓
張幟夜多然火以疑吐蕃懼而遁去庚寅入京子儀留守壬辰
元載判行軍司馬嚴武為黃門侍郎第五琦京兆尹兼御史大

夫高暉奔至潼關爲守者李伯越所殺十一月辛丑朔太常博士柳伉上疏以戎兵數萬衆犯關度隴歷秦渭掠邠涇不血刃而入京師謀臣不奮一言武士不力一戰提卒叫呼劫宮闈焚陵寢此將帥叛陛下也自朝義滅陛下自以智力所能故疏元功委近習日引月長以成大禍羣臣在廷無一犯顏回慮者此公卿叛陛下也近三輔亦叛陛下始出都城百姓謹然奪府庫相殺戮四方又叛陛下自十月朔名諸道兵盡四十日無隻輪入關者獨一魚朝恩以陝郡戮力安能守社稷乎如必欲存宗廟社稷獨斬元振首馳告天下悉出內使隸諸州陛下持神策兵付大臣然後削尊號下詔引咎幸德勵行屏嬪妃任將相許朕自新改過卽募士西與朝廷會若以朕惡未悛則帝王大器敢妨聖賢其聽天下所往如此而兵不至人不感天下不服請赤臣族以謝疏聞上思元振有保護功祇削官爵放歸田里十二月甲辰廣南市舶使呂太一反逐節度使張體太掠廣州丁亥車駕還京辛卯鄂州大風火發江中焚船三千艘民舍二千家乙未晉卿逾慶罷拜李峴黃門侍郎同平章事丙申放承宏華州一切不問丁酉朔方帳下殺僕固瑒傳首來獻懷恩聞之燒營遁入吐蕃朝臣稱賀上不受是月吐蕃陷松維保三州及雲山籠二城

同月十日食前食之

二年春正月壬寅元振抵法配流漆州癸卯顏真卿充朔方宣慰使癸亥劉晏李峴罷以王縉爲黃門侍郎杜鴻漸兵部侍郎並同平章事第五琦專判度支及諸道鹽鐵轉運鑄錢等使置諸道常平倉量置本錢和糴丁卯郭子儀充河東副元帥河中

中節度及耀德軍二月己巳朔開王為皇太子癸酉朝獻太
 清宮甲戌享太廟乙亥圓丘大赦戊寅裴冕轉運河南江淮已
 未第五琦開決汴河夏五月戊午加置兩省散騎常侍四員階
 正三品庚申楊綰奏罷歲貢孝悌力田童子等科六月癸未削
 懷恩官爵秋七月己酉李光弼薨八月丁卯命王縉代為都統
 九月大雨自七月起不止洛水溢丙申詔徵河中兵討吐蕃將
 發劫財吏不能禁丙午辛雲京檢校右僕射同平章事充太原
 尹辛亥郭子儀充北道邠寧涇原河西以東通和吐蕃及朔方
 招討安撫使己未嚴武攻拔吐蕃當狗鹽井兩城庚申命楊綰
 知東京選賈至知東都舉兩都分舉辛酉李峴知江南東西及
 福建道選事洪州刺史李勉副之是秋蝗食苗殆盡米斗千錢
 冬十月丙寅懷恩引吐蕃寇邠州白孝德閉城拒守先鋒郭晞
 敗之丁卯寇奉天京師戒嚴子儀屯涇陽挑戰不出十一月乙
 未懷恩與蕃軍自潰嚴方解丁未子儀入覲詔宰臣百寮迎於
 開遠門上御安福門以待十二月乙丑領關內河中副元帥暢
 璪為河中尹是歲戶部計帳管戶二百九十三萬三千一百二
 十五口一千六百九十二萬三千八百八十六時租庸法壞始命以
 畝定稅歛以夏秋又因國用急通借方青帥征之以給百官俸
 祿號青苗至是始行之

永泰元年春正月癸巳朔大赦元戊申授李抱玉僕射兼澤
 潞觀察鳳翔隴右節度和蕃等使四鎮節度馬璘副之癸丑罷
 岐州鳳翔縣併入天興二月丁丑出宮女千人品官六百人守
 洛陽宮戊寅党項羌寇富平焚定陵殿戊子河西党項永定
 等十二州部落內屬請置宜芳等十五州許之時勳臣罷節制

居京師皆無職事三月壬辰朔詔僕射裴冕郭英乂太子少傅
裴遵慶少保白志貞詹事臧希讓常侍暢瑾尚書王昂高昇崔
渙侍郎李季卿王延昌賈至涇王傅吳令瑤等十三人並待詔
集賢院間以文儒寵之上嘗有意容下而無聽諫之實左拾遺
獨孤及以爲恥上疏諫不能用庚戌吐蕃請和詔宰臣元載杜
鴻漸同盟于興唐寺是春大旱京師米斛至萬錢諸穀皆貴夏
四月己巳乃雨五月第五琦奏麥稔請十畝稅一如古法行之
二年民多流亡詔復停之六月甲申代州置代北軍平州置柳
城析通州石鼓縣置巴渠縣秋七月辛卯朔侯希逸爲副將李
懷玉所逐制以鄭王邈遙領平盧淄青節度大使懷玉權知留
後事九月辛卯太白經天時宰臣元載王縉杜鴻漸皆好佛上
問以果報事對曰國家運祚靈長皆宿植福緣所致雖時有小
災終不能害若此皆非人力所及豈得言無報應由是上深信
之凡遇災變寇亂內出護國仁王經付資福西明二寺講之懷
恩復誘迴紇吐蕃党項奴刺入寇逼于京畿詔權罷講經己酉
命郭子儀屯涇陽李忠臣屯東渭橋李光進屯雲陽馬璘郝廷
玉屯便橋駱奉仙李伯越屯盤屋李抱玉屯鳳翔周智光屯同
州杜冕屯坊州上親率六軍屯苑內庚戌下詔親征魚朝恩請
括私馬并團結男子塞京城二門之一士庶大駭值懷恩道死
其將僕固名臣來降丁巳吐蕃大掠焚廬舍而去智光追擊于
澄城破之冬十月己未復講仁王經吐蕃至邠州與迴紇相遇
合從復入辛酉逼奉天癸巳党項焚同州渾奴刺寇盤屋丁丑
子儀單騎出說迴紇與吐蕃疑貳庚辰及先鋒白元光合擊吐
蕃於靈臺縣西原斬首五萬級俘獲人畜凡三百里不絕京師

解嚴辛巳詔稅百官錢市絹十萬以賞迴紇乙酉迴紇首領胡祿都督來朝癸卯朔方將李懷光奏收靈武郡命路嗣恭兼知朔方節度使以鎮之封大將孫守亮等九人爲異姓王李國臣等十三人爲同姓王丁亥分宣饒欽置池州分弋陽置貴溪縣閏十月丁亥從百寮請聽納職田以助軍興急用辛亥蜀中大亂崔旰殺郭英父栢茂林楊子琳李昌夔皆起兵討旰

大曆元年春正月壬申減襲實封子孫半租永爲常式乙酉復補國子學生自安史亂學校荒廢祭酒蕭昕上言乃以諸道節度觀察都防禦宰相朝官六軍諸將子弟充之其學官委中書門下選行業堪爲師範者效用丙戌分天下財賦尚書劉晏領東都河南淮南江南東西湖南荆南山南東等道侍郎第五琦領京畿關內河東劔南西等道皆兼轉運常平鑄錢鹽鐵等使

二月丁亥朔釋奠於國學賜宰臣百官殮錢壬辰復鎮南都護依舊爲安南都護府壬子以杜鴻漸兼成都尹持節山南劔南東川等道副元帥張獻誠兼節度觀察使以討蜀亂三月辛未獻誠與旰戰于梓州敗績夏五月丙辰殿中侍御史韋光裔稅諸道青苗錢得四百九十萬貫歲以充百官俸料自春旱至六月庚子始雨秋七月辛酉河南諸州大雨洛水溢漂居人廬舍癸未太廟二室生芝八月壬寅鴻漸請以崔旰爲行軍司馬栢茂林爲邛南節度使甲辰魚朝恩判國子監充鴻臚禮賓等使進封鄭國公其黨裴士淹充禮儀使九月庚申上御安福門觀京兆尹黎幹所開漕渠自南山谷口入城北抵景風延喜門入苑由是京城薪炭始給冬無雪十月癸未朔御誕辰諸道節度獻金帛器玩服飾駿馬爲壽己丑太常博士柳芳撰承泰新論

二十卷宗正卿吳王祗奏上之和蕃使楊濟與蕃使論位藏等
來朝宴於中書省十一月甲子日長至大赦改元十二月己亥
彗起匏瓜其長尺餘犯宦者星癸卯周智光殺陝州監軍張志
斌前虢州刺史龐充據華州叛

二年春正月丁巳華州牙將姚懷李延俊殺智光并二子元耀
元幹以獻癸酉禁天下私習玄象所有天文圖書七曜曆太一
雷公式會衆焚燒不得藏匿違者坐罪丁丑昇魏州爲大都督
府庚辰禁王公宗子郡縣主家與軍將婚姻交好御史察訪彈
奏二月壬午幸昆明池踏青丙戌賞同華功封姚懷感義郡王
李延俊承化郡王仍蠲免一切賦稅郭子儀自河中來朝上以
寇難漸平命宰臣元載等置宴於其第三月丁巳田神功來朝
亦如之自此魚朝恩宴子儀子儀酬宴成費至十萬貫公卿大
臣列坐於席者百人夏四月庚子宰臣及朝恩與吐蕃同盟於
唐興寺六月戊戌杜鴻漸入朝廣納貢獻因薦肝才堪任上姑
息留知政事用肝爲劔南西川節度使杜濟爲東川觀察使封
衛伯玉城縣郡王秋七月戊申朔散騎常侍于休烈檢校工部
尚書知省事時勳臣昇八座多非正員以知省事爲名癸酉析
道州延唐縣置大曆縣八月庚辰李抱玉來朝壬寅駙馬姜慶
初得罪賜自盡九月甲寅吐蕃寇靈州乙卯寇邠州詔子儀率
師三萬鎮涇陽京城戒嚴戊午子儀移鎮奉天十月戊寅靈州
路嗣恭奏破吐蕃二萬始解嚴甲申減京官職田并幸京城士
庶出錢以助軍乙酉醴泉出于櫟陽飲之愈疾癸卯上御紫宸
殿策試茂才異行安貧樂道孝悌力田高蹈不仕等四科舉人
十一月庚申復黃門爲門下侍郎昇侍中中書令正二品侍郎

正三品壬申京師地震其聲如雷十二月魚朝恩作章敬寺以資太后冥福命毀曲江及華清宮以給之衛州進士高郢諫不聽丁酉辛雲京來朝是歲河東河南淮南兩浙福建等道五十州水災渤海靺鞨廻紇党項皆來朝貢

三年春正月上幸章敬寺度僧尼千人二月壬午邠寧馬璘來朝三月乙巳朔日食壬申割恆州衛唐縣置涇州以靈壽恆陽隸之夏四月戊寅張獻誠有疾薦其弟右羽林將軍獻恭代已爲梁州刺史壬寅崔旰來朝加檢校右散騎常侍以滑亳節度令狐彰代之五月乙卯追諡故齊王倓爲承天皇帝祔奉天皇帝廟同殿異室妻張氏恭順皇后祔葬辛酉改桂州臨源縣爲全義縣癸酉地震楊子琳乘崔旰入朝襲據成都朝廷憂之戊辰遣還進檢校工部尚書改名寧庚午轉邛州刺史鮮于叔明充東川節度使六月壬辰幽州軍亂殺節度使李懷仙朝命李涵宣諭以王縉領鎮副使朱希彩知本軍留後秋七月五星聚於東井占曰中國之利遣右散騎常侍薛旰使廻紇壬申崔寧弟寬攻破楊子琳收復成都望日內出孟蘭盆賜章敬寺設七廟神主書尊號於旛上百官迎謁光順門歲以爲常八月壬戌吐蕃十萬衆寇靈武京師戒嚴白元光破之丁卯寇邠州馬璘破之戊辰御史大夫崔渙以給青苗錢不平貶道州刺史加百官厨料增舊五分之一庚午辛雲京卒改王縉太原尹朱希彩幽州長史九月壬申子儀自河中移鎮奉天壬午吐蕃圍靈州戊戌鳳翔都將李晟屠吐蕃定秦堡焚其積聚蕃人聞之釋圍而去百寮稱賀始解嚴冬十二月己酉以吐蕃連入馬璘不能制徙之涇州割邠寧隸朔方郭子儀將吏聞之謀作亂知留後

段秀實斬兇首八人衆方定

四年春正月郭子儀自奉天來朝魚朝恩遊章敬寺甲申回
河中戊子法司議宗室潁州刺史李岫專殺賜自盡乙未從福
建觀察使李承昭議徙汀州於長汀縣之白石村黑衣大食國
遣使朝貢二月丙辰夜地震有聲如雷者三辛酉徙湖南軍於
潭州拜韋之晉潭州刺史湖南都團練觀察使江西魏少遊來
朝封趙國公三月壬申京畿戶口減耗省萬年丞一員尉兩員
徐縣各減一員委吏部條件處分拜尚書裴逾慶右僕射以劉
晏代之夏四月壬寅復陝州虞邑為安邑縣號州太平為湖城
縣五月丙戌京師地震辛卯李涵使吐蕃以僕固懷恩女為崇
徽公主嫁其可汗六月辛亥昇辰州為都督府析辰巫溪錦業
等州置團練觀察使秋七月己丑子儀鎮邠州朔方軍士久家

河中頗不樂徙逃歸者衆行軍司馬嚴郢誅其渠帥數日方定
己亥廢仙川襄城葉縣隸汝州己巳魚朝恩有罪自殺貶裴士
淹第五琦處饒二州刺史戊寅復罷度支轉運常平鹽鐵等使
委宰相領之自夏連雨至秋八月京城米貴斗八百錢出官糧
減價糶於貧民詔釋繫囚禁畿內弋獵冬十二月辛酉分京兆
府稅上等每畝一斗下等六升開墾荒田二升
同月十日好雨至
東忘下句之
五年春正月壬申張延賞兼御史大夫充東都留守罷河南四
道副元帥所管軍隸焉二月庚子湖南兵馬使臧玠殺觀察使
崔瓘據潭州為亂詔以羽林大將軍辛京果代之戊戌命澧州
刺史楊子琳道州裴虬衡州楊濟各出軍討玠己未夜彗起五
車長三丈五月己卯夜彗起北方己巳甲申徙置當悉相靜
恭五州於山險要害地以備吐蕃六月己未彗滅赦天下禁囚

秋七月京城斗米千錢丁卯王縉入朝以浙東觀察使薛兼訓
爲太原尹檢校工部尚書八月辛卯元載請置中都於河中府
秋杪行幸春中還京以避蕃戎侵寇之患意欲權歸於已收關
輔河東等十州戶稅入奉京師疏入不報九月丁丑吐蕃寇永
壽冬十二月乙未改巫州爲澁州業州爲蔣州

六年春二月河西隴右山南西道副元帥李抱玉奏所統兵自
河隴達于扶文綿亘二千餘里若吐蕃由兩道俱下首尾不贍
乃詔抱玉專備隴坻嶺南蠻酋梁崇牽作亂據容州經略使王
翊討擒之三月河北旱米斛萬錢夏四月上御宣政殿試制舉
人已未楊子琳來朝賜名猷戊寅詔禁綾錦花文盤龍對鳳異
色花樣惟長行白錦大小花綾任例織造五月成都司錄李少
良疏元載陰事上置之客省載奏與侍御史陸瑏評事韋頌漏
洩禁中語皆論殺之夏秋久旱八月己未始雨自此至九月不
止民苦害稼上益厭元載所爲思得朝臣不阿附者丙午自擢
浙江觀察使李栖筠爲御史大夫載尚不知因是稍屈冬十一
月己亥文單國王婆彌來朝獻馴象制授開府儀同三司試殿
中監是歲鄜州置蕭戍軍輪臺置靜塞軍滄州置橫海軍改泉
州爲兗州

七年春正月戊子於魏置豐州及觀城清豐縣并割臨黃隸澶
州以臨清之張橋店置永濟縣甲辰迴紇使出鴻臚寺劫掠坊
市吏不能禁復犯金光朱雀等門皇城皆閉慰諭之方止三月
壬辰詔諫議大夫四員爲定夏五月辛卯徙忻州七聖容於太
原紫極宮六月庚戌朔日食陰雲不見秋七月盧龍將吏李懷
瑗殺朱希彩推經略副使朱泚權知留後八月庚戌賜北庭都

護曹令忠姓名李元忠冬十月辛未授朱泚檢校左散騎常侍
充幽州盧龍節度使十一月庚辰詔以蕃戎入寇屢多征役免
巴逢渠集壁充通關八州租庸十二月丙寅雨土是夜長星出
於參辛未滑州置承平軍壬子禁鑄銅器癸酉大雪是歲秋稔
廼紇吐蕃大食渤海室韋靺鞨契丹奚非荆康國石國並遣使
朝貢

八年春正月癸卯勅在京三品已上并郎官御史每年各舉堪
爲刺史縣令者一人夏五月李栖筠彈劾吏部侍郎徐浩典選
不平貶爲明州別駕薛邕歙州刺史京兆尹杜濟杭州刺史秋
八月朱泚遣弟滔將兵防秋上大喜詔千騎送於國門甲午東
都留守蔣瓊兼知貢舉太府卿于頔爲京兆尹九月壬午循州
刺史哥舒晃反殺嶺南節度使呂崇賁以江西觀察路嗣恭代
之有大鳥見武功肉翅狐首四足有爪毛赤如蝙蝠羣鳥隨而
噪之神策將張白芬射斃以獻冬無雪十月庚申吐蕃寇涇與
邠州朔方兵馬使渾瑊與涇原馬璘極力追躡蕃軍潰去戊辰
郭子儀奏破吐蕃十萬百寮稱賀十一月元載請城原州以備
吐蕃是歲大有年汴宋田神功淮西李忠臣皆來朝

九年春二月癸丑郭子儀李抱玉皆來朝三月上以田承嗣驕
慢欲結其心以永樂公主妻其子華夏四月甲申中書舍人常
袞率兩省官十八人詣閣請論事詔引進各盡所懷乙酉子儀
率諸將大閱乙未華陽公主薨上悲惜累日不聽朝宰臣抗疏
陳請五月庚申詔以歲豐穀賤令度支轉運率諸色雜錢送納
上都以備和糴丙寅涇原馬璘來朝諷將士進狀求爲左僕射
知省事從之朱泚表請入朝自率五千騎防秋詔所司築第以

待六月番僧不空死贈司空賜爵肅國公諡曰廣智癸亥判度
支韓滉奏安邑池生乳鹽是夏詔城奉天以備蕃寇於隴州華
亭縣置義寧軍秋七月久旱京兆尹黎幹歷禱諸祠未雨請禱
文宣廟上笑之八月甲寅劉晏知三銓選事己未吐蕃寇靈武
庚午方退九月癸未晉州男子郇謨進三十字一字言一事上
召見賜衣館之禁中罪左巡殿中侍御史楊護抑而不聞命貶
之戊子加朱泚檢校戶部尚書封懷寧郡王冬十二月壬辰赦
十年春正月己酉田承嗣誘昭義兵馬使裴志清逐留後薛勣
詔遣中使孫知在宣諭各守封疆命李承昭權知留後癸丑承
嗣拒不奉詔襲洛與衛州盡盜所管地自署官吏丙寅罷辰錦
溪獎五州經略使復隸黔中辛未以藩鎮漸強議封皇子兼領
天下諸州述睦王領嶺南節度度支營田經略觀察處置等大
使逾榔王領渭北鄜坊等州連恩王迥韓王領汴宋等州遊鄜
王造忻王領昭義等軍皆節度大使暹韶王運嘉王遇端王邈
循王通恭王遠原王逸雅王並開府儀同三司丙子河陽軍亂
逐三城使常休明迫牙將王惟恭爲留後三月甲午陝州軍亂
逐李國清縱兵大掠一夕方定己巳薛勣常休明至闕待罪夏
四月乙未削田承嗣官爵命河東等九道出師討之甲申大雨
雹暴風拔樹人多震死損京畿七縣稼五月劔南置昌州癸卯
罷兩都貢舉停童子科六月遣御史大夫李涵督諸節度併力
秋七月己未大風浙杭潮溢溺民家五千船無算八月乙丑李
承昭破魏將盧子期於清水縣生擒以獻九月戊申迴紇殺人
於市吏捕繫萬年獄首領赤心劫出之癸丑吐蕃寇隴涇李抱
玉馬璘連擊退之戊午朱泚留征吐蕃加同平章事移鎮奉天

冬十月辛酉日蝕癸亥以馬燧充河陽三城節度使丙寅貴妃
獨孤氏薨帝寵愛追贈貞懿皇后十一月丁酉承嗣僞瀛州刺
史吳希光以城降丁未路嗣恭攻破廣州擒哥舒晃斬首以獻
十一年春正月庚寅朔詔赦田承嗣壬辰遣諫議大夫杜亞宣
慰許令入朝辛亥劍南崔寧大破吐蕃斬首萬級生擒首領來
獻二月癸亥荆南衛伯玉入朝卒于京師以張延賞代之戊子
河陽軍復亂監軍使冉廷蘭斬其亂首方定夏四月己卯汴將
李靈耀殺兵馬使孟鑿北連承嗣五月癸巳轉李勉汴宋節度
使授靈耀濮州刺史拒不受六月戊戌復以充汴宋留後秋八
月丙寅靈耀據汴州叛甲申命淮西李忠臣承平李勉河陽馬
燧三鎮兵討之閏月丁酉太白經天九月乙丑忠臣等進營鄭
州靈耀率衆薄戰淮西兵亂退屯滎澤冬十月乙酉忠臣等破

靈耀於中牟又敗之於西梁固遂入城固 乙丑承嗣遣田悅

率兵三萬赴援丙午淮西河陽合擊大敗之悅脫身北走靈耀
聞之棄城而遁丁未滑將杜如江生擒以獻汴州平加李忠臣
檢校司空同平章事兼汴州刺史以鎮之十二月丁亥論取鄆
濮二州功正己實臣皆加檢校司空同平章事庚寅馬璘卒以
段秀實權知留後李承昭稱疾以李抱玉權知留後

十二年春正月辛酉授秀實涇州刺史兼充都團練使壬辰渤
海獻日本國舞女十一人二月戊子李正己徙治鄆州以子納
守青州刺史充淄青節度留後丁未轉李國清黔州刺史三月
乙卯李抱玉卒癸亥陞少尹鮑防爲太原尹庚辰復田承嗣并
諸子等官爵賜以鐵券庚辰元載王縉有罪下獄辛巳賜載自
盡貶縉括州刺史夏四月壬午以楊綰爲中書侍郎常袞門下

侍郎並同平章事癸巳除載所忌故相李揆為睦州刺史綰等
薦顏真卿以為刑部尚書丁酉崔寧奏破吐蕃於黎雅州擒大
籠官論器然以獻壬寅渤海奚契丹室韋靺鞨並遣使朝貢已
酉加在京文武官料錢一歲十五萬六千貫并舊給凡二十六
萬貫五月辛亥關內副元帥渾瑊兼并州刺史罷諸州團練守
捉使名甲寅改諸道邸務在上都者名曰進奏院六月癸巳旱
齋居祈禱聖體違康遂不視朝秋七月戊午罷潤州丹陽并蘇
常州軍八月癸巳加東川節度使鮮于叔明檢校工部尚書賜
以國姓癸卯常袞等辭堂饌九月辛酉段秀實兼四鎮北廷行
營涇原鄭棣等州節度使庚午吐蕃寇坊州掠党項羊馬而去
京兆黎幹奏宋亳陳滑諸州大水損田與度支韓滉所奏不類
差御史趙計檢實渭南令劉藻附滉奏云無損上歎息縣令職
在字人乃不仁若是命與計皆貶官冬十月丁亥滉又奏解縣
兩池生瑞鹽令置神祠境上號寶應靈慶池乙巳以滑州牙將
劉洽為宋州刺史十一月癸酉顏真卿獻所著韻海鏡源十二
月丁亥崔寧又破吐蕃十萬於西山斬首八千生擒九百人加
檢校司空庚子朱泚兼隴右節度副大使權知河西澤潞行營
兵馬事

十三年春正月辛酉京兆請修六門堰壞碾磴八十餘所以漑
農田戊辰迴紇寇太原鮑防與戰不利二月庚辰代州都督張
光晟破之于羊武谷北人始安三月甲戌河陽將士劫迴紇輜
重因與相鬪縱兵大掠久之方定夏四月甲辰吐蕃寇靈州朔
方留後常謙光擊敗之五月戊午賜宦官劉清潭名忠翼六月
戊戌朱泚獻猫鼠同乳秋七月壬子中書舍人崔祐甫知吏部

選事辛未吐蕃寇鹽慶二州子儀遣懷光擊破之冬十月丁酉
始葬貞懿皇后於莊陵十一月丁卯日長至上不視朝命有司
代祀南郊是歲郴州黃山崩壓死數百人
十四年春正月壬戌李泌名見以為澧州刺史二月癸未田承
嗣卒李寶臣請以悅為留後從之三月丁未淮西都虞候李希
烈逐從父忠臣自立夏五月癸卯上不康至辛亥不視朝辛酉
詔皇太子監國是夕帝崩于紫宸殿在位一十七年壽五十二
遺詔皇太子柩前卽位壬戌遷神柩于太極殿發喪諡曰睿文
孝武皇帝廟號代宗

冊曰憂患而生安樂以死死非一已延及孫子內叛外侵
東傾西北執熱思涼死而後已

